

攻

媿

集

七



臺灣省圖書館  
中文圖書



攻 媿 集  
(七)

J  
17.8  
1,2009

樓 鑰 撰

# 攻媿集卷三十四

## 外制

吏部尙書趙汝愚兼侍讀

敕。朕退朝之餘。務學爲急。開邇英之閣。肆求經史之遺言。對無逸之圖。慨念祖宗之美意。正有資于勸誦。顧何憚于增員。具官某秀出天支。蚤收儒效。擅開平之譽。久宣出藩入從之勞。條晁董之言。尤見憂國愛君之意。謹銓衡于選部。實領袖于禁途。朕惟歷代編年之詳。萃于通鑑之紀。三朝致治之要。列于寶訓之書。爾其因事進規。盡忠無隱。矧是宗盟之彥。首陪經幄之游。尙服異恩。以稱公選。

寄資武功大夫幹辦御藥院陸彥端轉歸吏部除帶御器械依舊幹辦太一宮

敕。具官某。爾給事宮省。謹而寡過。肆還寓秩。列之銓選。屬鞮九陛。仍護行宮。往哉惟欽。毋替于舊。

武經郎趙不淹換太子右監門率府率

敕。具官某。國家宗支。視古爲盛。然以屬近行尊。得奉朝請者。亦鮮矣。爾修飭有素。宗老薦其詳雅。授以正率。日陪近班。尙勉之哉。以永終譽。

許從善循修職郎

敕具官某爾以假吏往從使節茲登仕籍始得論賞雖曰踰時亦不失勞矣

從政郎邵武軍司理張令照降兩資放罷

敕具官某治獄之職惟公則平爾曲奉上官縱吏爲僞以陷人于深文臺評來上罰其可道再鑄厥階歸務循省

修武郎前監紹興府東城酒庫馬益降兩官

敕具官某爾職權酷驚擾田里憲臺按治歸訟自解削秩免官以正名分

朝散大夫知邵武軍趙師造降兩官

敕具官某政平訟理郡太守之先務也爾按吏不審乃諷脅理官僞爲文記以傳致其罪彼罪雖得爾其可佚罰乎褫秩二等以戒鍛鍊之吏

從政郎賀正使書狀官俞南仲循兩資

敕具官某朝廷選修聘之使而使之自選其屬爾以庠校之彥爲之少從禮成而歸賞可後乎

何謙韋益竝循修職郎

敕具官某集故事以成書儒館之職也爾隸西省

韋益改東省

亦預有勞既登仕版仍進一階

朝散郎温州通判傅頤降一官放罷

敕具官某權貨之禁至爲嚴密治中別駕實專掌之爾職在是而不能戢吏卒之冒法豈惟關防之弗嚴

抑見威令之無素。削秩免官。以懲不恪。

福州觀察使王抃父康贈武功大夫成州團練使

敕。朕肇禋南郊。祇見上帝。爰推霈澤。以及萬方。仕登朝列。皆得以及其親。具官某。故父具官某。有子以廉車告歸。爾亦預此卹典。尙其有知。欽承休命。

寄資右武大夫遙郡防禦使皇子嘉王府都監韓世榮轉歸吏部在京宮觀

敕。官躋橫列。使領遙防。是爲右選之華。用示內班之寵。具官某。進謹赤墀之奉。退祇朱邸之勞。歷年寢多。以疾來諗。俾隸名于銓部。仍賦祿于真祠。尙服渙恩。以保終吉。

承節郎潘時美嫡母孔氏年九十一歲封孺人

敕。具官某嫡母孔氏。比肆郊霈。推老老之恩。爾年登九齡。子爲命士。予之湯沐。以爲晚歲之華。

通奉大夫顯謨閣待制陳峴係韋潛心舉主降一官

敕。賢引其類。固難保于終身。稱匪其人。亦何逃于定制。具官某。早登臚仕。屢薦小官。逮歷歲之既深。有字民之無狀。按章不審。雖多刻吏之文。具獄旣成。莫掩貪夫之迹。考尋舉將。乃屬從臣。以嘗遇于霈恩。姑稍鑄于命秩。尙爲寬典。毋有遐心。

嘉王府講尙書徹章官屬各轉一官

承議郎中書舍人兼翊善黃裳

敕朕有元子。教之以義方。爾以名儒。導之以經術。既闡百篇之奧。可稽一秩之喪。具官某。造理精深。處心夷曠。出廷臣之右。能介而通。從吾兒之游。最專且久。博文約禮。欲著乎心。考古驗今。如指諸掌。因乃天資之美。加之學力之優。茲焉進官。姑以示寵。惟帝王之胄。非務爲章句之徒。發經史之微。尙益明事物之要。旣上紫垣之直。仍先朱邸之僚。進有賴于論思。退尤資于講習。其祇朕命。式究爾心。

承議郎著作郎兼贊讀黃艾朝奉郎軍器少監兼直講陳士楚

敕具官某。朕以元子天資之良。遴選賓友。以輔導之。惟爾艾爾士楚。俱以儒英。從吾兒游。典謨訓誥。誓命之文。講貫旣久。以至終篇。旌爾賢勞。何愛一秩。其益暨乃僚。秉乃心。相與發明經史之要。日計不足。而歲有餘。厥惟休哉。

知揚州錢之望復直寶文閣

敕具官某。朕肇禋南郊。爰肆霈澤。士有一眚。咸復厥初。矧吾帥臣。起臨邊閫。日著聲績。如爾之望者。顧可後乎。爾守襄陽。煩言洊至。稍鑄寓職。于今三年。因予秦時之恩。歸汝寶奎之直。其祇寵沃。益懋爾功。

成都府路第二將高師顏制置使司奏舉知黔州

敕具官某。蜀道萬里。士有負文武之才者。朕何自而知之。爾起將家。歷戎職。制使謂爾通練老成。連帥又稱其沈毅通敏。朕以二臣之言。試爾以黔中之守。爾能不負所舉。則知所以報國矣。

泉州同安縣靈護廟神封威惠侯

敕具某神。朕之愛民至矣。吏治于明。神職于幽。苟利吾民。雖遠必錄。以爾神廟。食海嶠。久著靈迹。卻蠻蠹。而張官軍。招海賈。而銷癘疫。有司覈實。具以上聞。錫爾嘉名。歆予茂渥。

承直郎坑冶司檢踏官蔣蓋降一資放罷

敕具官某。國家置使江左。以總諸道之貨泉。設屬支郡。以究山澤之遺利。爾其屬也。治工爭攘。至相戕殺。爾實啓之。勅章既聞。其上一秩。免所居官。吏之不虔。庶乎知警。

修職郎臨安府昌化縣主簿趙善視降一等放罷

敕具官某。爾筮仕之初。密在畿邑。是何么靡。敢爾披猖。鐫秩免歸。尙爲輕典。爾則自取。將誰咎哉。

入內侍省都知鄧從訓該奉上高宗皇帝徽號冊寶。轉協忠大夫。依前奉國軍承宣使。

敕朕推尊烈祖。務極隆名。寶冊之嚴。式資辦護。均行賞典。爾則先之。具官某。服在禁庭。恪共衆職。橫班秩峻。旣兼留務之華。高廟禮成。實任賢勞之首。爰加命秩。用答爾勤。

倪思等係常良孫舉主各降一官

禮部侍郎倪思

敕人未易知。其來已久。士不自愛。乃至于斯。旣駭予聞。致貽伊戚。具官某。夙推清望。遍歷華途。比因繕監之遷。爰謹屬察之薦。家旣傳于清裁。人亦謂其端良。俄隱隱之違彰。何貪心之已甚。考尋舉將。乃屬從臣。以其未脫于七階。俾爾姑鐫于一秩。勿以懲羹之故。而忘推轂之公。

中散大夫知通州章冲

敕具官某人之難知。舊矣。爾爲南蘭陵。以戶曹爲賢而舉之。閱歲既久。乃以賄聞。申舉將之罰。不可廢也。其上一秩。毋忘省循。

隆興府佳山孚應廟神封惠濟侯

敕具某神。國家愛重爵賞。非有功不侯。人神一也。以爾神生而不求聞達。以忠孝而化人。沒而能著靈響。有功利以及物。手植之槐猶在。舟行之禱必答。予之好爵。其尙欽承。

朝請郎致仕劉礎降一官

敕具官某。朕視嶺海。猶畿甸也。爾守蒼梧。而部使者謂爾加賦于民。且曰。遂祠請而未拜。聞勅章而徑行。雖已挂冠。豈容幸免。姑鑄一秩。以示薄懲。

從政郎錢逖降兩資候服闋日與遠小監當

敕具官某。細民以養海爲業。私販冒禁。或未能免。爾仕至邑令。又方執喪。使者廉按。謂爾爲逋逃之淵藪。何耶。削去二階。姑令終制。朝祥暮貶。其尙何辭。

寄資訓武郎嘉王府都監朱思正轉歸吏部在京宮觀

敕具官某。服役內廷。兼官王邸。克勤所職。以疾丐閒。祿以內祠。秩之吏選。尙欽朕命。以善爾躬。

成鏞知黔州



敕具官某爾奮由武科屢更事任黔中雖遠委寄不輕外控夷蠻地當一面命爾作守凡牧民固圉之事尙勉之哉

寄資武義大夫果州團練使重華宮祇候董友聞轉歸吏部

敕具官某爾職聯中禁使領遙圍共事累年以疾求退俾仍舊列往赴右銓益務檢身以俟收用

乘義郎閤門看班祇候韋琳報班差錯降一官

敕具官某朝儀尙肅賓贊尤嚴進退降登視以爲節抗聲失度時汝之辜爰削一階以懲不恪

郭棣知瀘州

敕掌殿嚴之武衛夙著勤勞分邊闡之顧憂茲煩鎮撫睠予世將聽我訓詞具官某稟資沈雄馭下嚴整出臨淮海嘗當一面之權入總貔貅久護千廬之密比歸故里旣歷累年惟時瀘川控彼蜀道靡有蠻夷之外侮何期蝥賊之內訌狂卒稱兵衆無與者仇人假手天實誅之顧平時謀帥之甚艱豈今日擇才之可後疇堪予選僉曰汝諧爾其設方略以靖驚疑示寬大以安反側凶徒旣殄無問脅從義士實多當行第賞綏爰有衆遂令境內之清坐折遐衝益致王靈之暢佇聞嘉績別議優恩

文州靈惠豐安侯加封嘉應

敕具某神朕成民而致力于神陰平去都城萬里苟有利于民亦不汝遺也增以嘉名用答靈貺尙其敬奉以惠遠氓

文林郎保寧軍節度推官趙善謙降一資放罷

敕具官某。爾以宗子居大郡幕府。不能自潔其身。乃與肯徒共爲姦利。償券焚厯。欲蓋彌彰。鑄黜示懲。尙服寬典。

文林郎寧國府司理盛將之降一資

敕具官某。獄事至重。豈容小差。爾職其間。乃爾失當。諒其非故。姑示薄懲。

承信郎石璿父榮年九十五保義郎致仕

敕具官某父某。比肆郊霈。推老老之恩。爾年登九齡。子爲命士。授之武爵。以爲晚歲之華。

興化軍莆田縣順濟廟靈惠昭應崇福善利夫人封靈惠妃

敕明神之祠。率加以爵。婦人之爵。莫及于妃。倘非靈響之著聞。豈得恩榮之特異。具某神。壺彝素飭。廟食愈彰。居白湖而鎮鯨海之濱。服朱衣而護雞林之使。舟車所至。香火日嚴。告賜便蕃。旣極小君之寵。禱祈昭答。遂超侯國之封。仍靈惠之舊稱。示褒崇之新渥。其祇朕命。益利吾民。

朝請郎張抑係舒光舉主降兩官

敕具官某。人之難知舊矣。爾持江東使者節。以池陽郡博士爲賢而舉之。閱歲已久。乃以賄聞。比申舉將之罰。惟爾在哀疚而未及。旣除喪矣。其上二秩。毋忘省循。

遙郡刺史知和州某依舊武功大夫祁州團練使

敕具官某將門出將其說古矣紹興以來名將之後人才不乏鮮有以將略世其家者爾起自西陲屬鞭九陞頃由選擇出守山陽雖邊塵不驚智勇無以自見而首尾五載固圉有勞徙之大邦陞以遙團之秩朕之知汝深矣勉趨功名毋忝爾祖

寄資訓武郎韓果轉歸吏部在京宮觀

敕具官某服役禁庭屢更歲籥恪勤厥職式閱其勞祿以內祠秩之吏選尙欽朕命以善爾躬

文林郎監泰州鹽倉周大老降兩資放罷

敕具官某鹽筴之盛莫如海陵積弊之深亦非一日今帑中之藏至失十萬白發吏姦汝之職也詳究始末失職已多而又不能自別于賞貸之嫌再鐫厥官歸務循省

朝奉郎知湖州烏程縣趙彥衡爲鄉民訴水傷擁併死損八人降一官

敕具官某爾試邑輔郡能聲徹聞秋潦爲災訴者輻湊老羸蹂躪至有死傷雖非關防所及咎將誰歸其上一階服我寬典

嘉王府講尙書徹章官屬諸色祇應人各轉一官資

內知客修武郎譙令雍秉義郎戴勳

敕具官某賢王務學講席徹章惟此百篇之書坐閱八年之久凡預職守咸進官聯爾起于諸生班在上閣祇事朱邸見謂恪恭渙恩所加勿謂故事尙勉思所以稱此者哉

使臣忠訓郎姜文用孫昌祖忠翊郎姚思正保義郎董致中徐松成允顯高珂指揮使從義郎馮涇王良講堂使臣秉義郎蔣巨卿張克家講堂書寫文字進武校尉張桔承受所手分承信郎舒良嗣承受下主管文字忠翊郎遜興祖客司成忠郎傅宣世前都監訓武郎朱思正醫官成全大夫陳世安翰林醫候李之美成全郎陳翊

敕具官某等王邸談經閱歲滋久凡曰執事咸進厥官往其欽承益務恪恭

秉義郎楊忠輔換太史局丞權同知算造

敕具官某周之馮相氏保章氏皆以中士爲之星麻之學爲士者可不務乎爾達于麻徹于朕聽因其所長俾貳局事推步日月星辰之行以稱朕欽天授時之意爾尙勉哉

殿前指揮使行門長行左班楊坦劉選李端刑敞沈明黃毅杜椿吳珪蔡顯右班王佐邊寧李鈞孫彬陳瑀曹渙王浹黃義陳圭換武翼郎添差諸州駐泊兵馬都監

敕具官某等行在所猛士如林又擇其雄毅之尤者列在人門爲予爪牙歷歲旣久親閱挽強之技超授武爵護戎方州錫之袍帶以寵爾行毋忘衛上之忠益習近民之事尙勉之哉

殿前指揮使守闕行門長行左班許坦聶榮明澤孫伸右班盛俊吳侑郭錫換從義郎

敕具官某爾等以拳勇選密侍宸居有年于茲矣親閱其藝視高下而賦之爵尙勉之哉毋怠于事

神騎倅補副指揮使姜勝換秉義郎宣武倅補指揮使徐成換從義郎天武下名副指揮使呂俊換

修武郎

蒙。敕具官某爾等早以武勇備予羽衛閱歲既久而挽強之力不衰授爵有差往親民事益務忠恪以稱所

趙介循從事郎

敕具官某爾以刀筆爲冊府之吏周旋四庫其職清矣又以奏篇之賞疊進資級其思所以稱此者哉

入內內侍省都知鄧從訓轉履正大夫依前奉國軍承宜使餘如故

敕總禁廷之務久矣宣勞居橫列之班茲焉進秩具官某持身克謹遇事惟勤出入宮闈習見累朝之故實侵尋歲月兼提衆職之綱條爰因酒正之修更陟武階之峻勿云近比思稱優恩

蕭鷓巴奏孫秉義郎存德乞將磨勘轉官回授母淑人耶律氏封郡夫人

敕命婦之封率從于夫爵小君之號茲越于邦彝某人早孀名將之家同慕中華之義兩朝示寵名已著于鳩桑一子貽恩榮特頒于鸞詒往服朕命益宜爾家

朝奉大夫錢之望奉使回程轉一官

敕具官某比遣使華往修鄰好聞其扶疾慮有闕事見大夫非無可使恐不及期以爾志存許國才足應變輟自邊閩俾將予指聞命引道禮成來歸進之一秩姑以勞還俟訖外庸嗣有褒擢

武翼大夫楊大節奉使回程轉官

敕具官某。朕歲遣使華。往修鄰好。必選上介。以輔其行。爾以扈衛之臣。爲行人之副。中途易節。調護無虧。惟爾之能。應予之賞。俾增命秩。其尙欽承。

奉使官屬文林郎陳元震。從事郎譙令憲。迪功郎錢廷玉。忠訓郎邵師孟。忠翊郎黃允迪。訓武郎李邦安。忠翊郎楊祖烈。吳良弼。趙進。承節郎張達。符溥。從義郎何洵。保義郎金彥。達進。武副尉王冲。各轉一官。

敕具官某。歲遣信使。修好鄰邦。凡爲假吏之行。舉有優恩之及。用酬勞動。毋替忠勤。

武功大夫和州防禦使殿副都指揮使郭杲落階官

敕總千廬之衛。久護戎昭。頒一札之恩。用申褒律。具官某。器資沈鷲。謀略雄深。飭邊備于上游。坐銷外侮。肅軍容于中壘。允藉壯猶。朕慨宿將之無多。眷故家之可用。繫爾昆弟。爲予爪牙。茲徹武階。俾專使領。庸示等威之峻。式昭名器之公。其服恩榮。尙圖忠報。

閣門祇候訓武郎李彥機從義郎李刪秉義郎楊應龍應奉人使到闕一十番各轉一官

敕具官某等。信使來庭。掌在上閣。賓贊之職。不容毫釐之差。祇事累年。積勞可賞。進之一秩。益務恪恭。從事郎成州天水縣令韓廷圭降兩資

敕具官某。邊臣無小大。皆以忠實爲先。爾以逸囚受罰矣。而又爲欺。游削一階。用戒來者。皇叔祖士峴男太子右監門率府率不恡轉一官

敕具官某。國家以十階待近屬。必十載而後一進。其選嚴矣。惟我宗老。行尊年高。爰寵其子。躡等而授。雖曰近比。實惟異恩。

忠翊郎李孝純落階官閣門宣贊舍人

敕具官某。爾以名將諸孫。中宮兄子。不患不致富貴。顧所以將之者何如耳。頃墨吏議。亦既累年。察之蓋詳。克自循省。賓贊之職。用以命汝。念之哉。知復玷缺之艱難。則知所以保其身矣。

故責授安遠軍節度行軍司馬詹儀之追復中大夫

敕具官某。朝廷念廣西鹽筴之弊。因爾建議。使行其言。非徒無益。而又害之。爾既知其不可。而不能自己。何也。解弦更張。事始少定。褫官置散。以謝遠民。而爾亦亡矣。爾豈欲害民者。徒以昧于不遠復之義。而致此。亮其本心。追復舊秩。能體此意。尙爲有知。

大中大夫參知政事胡晉臣提舉修壽皇會要并禮儀使轉一官

敕朕寅紹丕圖。推尊慈極。纂修帝制。尤嚴于五載之餘。登奉寶儲。遂全此一王之法。惟時近弼。兼總宏模。矧相禮以備成。豈疇庸之可後。具官某。該通而知務。端靜而善謀。頃上禁途。居然有公輔之望。迨升宥府。足以致朝廷之尊。俾參預于政機。益茂明于國體。緝成大典。允藉宗工。誕舉緝儀。更資使範。以修重華之盛。以彰疊矩之傳。爰序進于崇階。尙勉從于遜牘。增培采食。仍衍真奮。噫。鋪張闋休。實贊我顯親之志。奉行故事。尙堅而致主之心。往服訓辭。以綏寵渥。

從事郎趙彥适收使射中減磨勘循一資

敕具官某國家選士于廷。又命以射。爾以宗支之秀。既擢儒科。能游于藝。且應賞格。何愛一階。以示勸獎。

從事郎王堯佐前任復州司理載鐵錢入銅錢界算請鹽鈔降一資

敕具官某冒利犯禁。齊民則有之。爾爲獄掾。乃敢以身而試法。稍鑄命秩。猶爲寬恩。

朝請郎尉開詩前知永康軍拖欠綱運降兩官

敕具官某朕崇儉示樸。未嘗加賦于郡邑。然軍餉則不容缺也。永康雖小。賦入有度。及爾爲之。闕供甚矣。鑄去二秩。以勵其餘。而猶不奪爾合江之符。以不得罪于民也。其務足用。勿以懲羹而取盈焉。

朝散大夫知明州高夔爲提刑陳倚申厲雄公事不自陳避嫌降一官與邊郡

敕具官某爾以選擇屢典大藩。四明富民之訟。使能俟屬邑之公行。聽憲臺之移獄。則晏然無事矣。却使者謂爾不能引嫌。疑有未盡。鑄官一等。易地邊方。汝往哉。其思有以靜鎮之。

朝散郎國子博士徐曉上殿墜笏降一官

敕具官某爾以老書生獻箴于朝。此意勤矣。朝儀貴肅。乃爾失度。雖欲宥過。不應但已。稍鑄命秩。以儆廷紳。

寄資右武大夫遙郡團練使符滌降兩官放罷

敕洒掃是職。專務盡恭。過愆有聞。豈應從恕。具官某久以勤敏。祇事禁嚴。嘗克謹于官箴。乃自貽于罪罟。



命鑄橫列。尙昇遙圍。罷歸銓部之班。顯示貂璫之戒。

內侍高品李元美降忠翊郎放罷

敕具官某。禁廷貴肅。三尺尤嚴。爾職其間。而越法度。削官二等。尙爲寬恩。

閣門祇候潘瓊落看班

敕具官某。爾祇事昕朝。再更歲籥。稽之故實。盍正官稱。益務恪恭。毋怠于久。

皇后親嫂碩人許氏特封郡夫人

敕命婦之封。蓋從于夫爵。小君之號。茲出于上恩。故某官妻許氏。蚤續將家。今爲后族。廉車旣往。莫諧偕老之宜。咸開方輿。實號懿親之長。屬禕衣之歸謁。分石窳以疏封。尙惟法度之循。以對寵光之渥。

直敷文閣史彌正爲高夔奏厲雄公事落職罷宮觀

敕具官某。爾奉祠就養。宜無預于公府。知篤葭莩之好。而忘瓜李之嫌。事發相重。遂徹朕聽。收遷延閣之直。仍罷祠宮之官。尙其省循。予不汝棄。

侍御史林大中直寶文閣知寧國府

敕具官某。朕惟天子耳目之官。與夫言語侍從之臣。皆極天下選。豈應輕去。然進退之際。君子之大致存焉。朕亦欲有以全之。爾以清德雅望。周旋三院有年矣。憂國之忠。匪躬之節。論事有體。義形于色。臺綱斯振。物論浩然。擢貳銓衡。所冀獻納之益。而抗章自列。引義不回。宣城大邦。實慈皇初潛之地。寓直寶奎。以

寵爾行。牧御之方。無俟多訓。勿以在外。而忘告猶。政成來歸。副我虛佇。

知漳州鄧駙江東提刑

敕。具官某。入而居獻替之選。出而任澄按之寄。皆朕耳目之官也。以爾端靖有守。雅望甚休。擢在諫垣。出鎮南服。江左祥刑之重。肆以命汝。豈惟引以寢近。爲爾之寵。抑使列城之人。知朝廷垂意臬事。至遣諫官以臨之。書不云乎。好生之德。洽于民心。朕將庶幾焉。

知廬州許及之大理少卿

敕。具官某。朕承累聖仁厚之餘。雖罔敢兼于庶獄。而明罰敕法。求惟厥中。乃者。播告之修。孚于中外矣。爾以諫省之舊。知予德意。而明敏詳練。無施不宜。召自邊閩。用爲廷尉之貳。昔張釋之使天下無冤民。于定國爲之。民自以爲不冤。汝往哉。其爲朕持天下之平。且以行汝學道愛人之志。

大理評事李珏再任

敕。具官某。廷尉之屬。非明于文法。不以輕授。非遲以歲月。不能貫通也。爾以名家子。庀職旣久。以其自列。爰俾因任。尙圖來效。勿替厥初。

故太傅蒲察久安女碩人乞用父遺表恩澤封郡夫人

敕。命婦之封。蓋從于夫爵。小君之號。茲出于君恩。某官女碩人蒲察氏。生長北方。來歸王國。謂父兄卽世。惟一身之僅存。而恩渥自天。曾累歲而未請。乃叩九關之邃。願加列郡之稱。亮其忱衷。矧有近比。特疏予

寵用慰爾心。

忠訓郎興州遊奕軍權統領常崇轉一官

敕具官某。朕周知中外將士之才。間使來前。用閱其實。不以遠近爲間也。爾來自西陲。人物可採。何愛一秩。以寵爾歸。益習戎韜。以俟有用。

殿前司神勇軍統制訓武郎劉肇步軍司左統制修武郎姚旦總轄牧放倒斃數少各轉一官

敕具官某等。歲分遣諸軍。牧于瀾右寬閒之鄉。惟統御有方。芻秣以時。歸而閱實。生全者衆。進之一秩。以爲來者之勸。

高夔知廬州

敕具官某。爾頃守合肥。嘗移之內郡。近守四明。又易以邊方。乃自制司。復分帥閩。蓋以爾習熟淮甸。有志事功。故因以遷焉。內有以固吾圉。外有以宣王靈。爾尙勉之哉。

朝奉大夫新知昌州程仲虎爲虧發官錢降一官與閑慢差遣

敕具官某。朕崇儉示朴。未嘗加賦于郡邑。然軍餉則不容缺也。廣安雖小。賦入有度。及爾爲之。闕供甚矣。姑鑄一秩。以爲罷軟之戒。

皇弟右監門衛大將軍某州刺史多能多助。收使父居中。遺表各轉遙郡團練使

敕具官某等。朕親睦九族。務從優恩。而十階之進。則謹守舊制。未嘗私也。以爾父嘗建節旄。不及中壽。遺

奏之澤。未請于朝。俾爾昆弟俱領遙圍之任。朕之于爾厚矣。尙惟恪恭。以綏寵祿。

林曠閣門舍人

敕。具官某。爾以武科首選。戍職上閣有年矣。銜恤告歸。免喪入見。俾還舊班。益務恭恪。

中大夫知寧國府蔣繼周磨勘轉官

敕。擁千里之麾。方著民庸之茂。考三載之績。尙伸吏課之公。具官某。被眷慈皇。進班言路。以中執法之舊。爲東諸侯之尊。政最有聞。尙有稽于褒表。封章來上。何屢請于歸休。茲以年勞。應于銓法。爰峻文階之秩。遂登從橐之聯。大異庶工。往祗茂渥。

知廣州岳霖敷文閣待制致仕

敕。帥閫有嚴。方任顧憂之寄。囊封何遠。來騰告老之章。驚爾疾之寢深。撫予衷而甚戚。具官某。秉心端亮。遇事詳明。少歷艱勤。養成畏謹之性。晚更事任。率有循良之稱。念方虎之舊勳。擢金吾之近侍。一辭軒陛。游閱歲時。起分嶺表之麾。俄感漳濱之疾。宦游南海。曾無暖席之淹。次對西清。用示挂冠之寵。尙期自厚。以冀有瘳。

岳霖贈四官

敕。挂冠有請。方聯次對之班。易簪可哀。宜厚飾終之典。云胡弗淑。而至于斯。具官某。出自勳門。動邁士檢。攬轡登車之寄。夙著賢勞。簪筆持橐之除。實由親擢。分五羊而作牧。擁駟馬以啓行。何恙之深。此生遂已。

念世臣之無幾。愴長夜之不晨。忍聞垂絕之言。寧愛不貲之寵。躡四階而進秩。按三尺以疏恩。用大爾家。庶將予意。

知贛州趙彥操知廣州

敕具官某。爾頃爲列卿。攝民曹。領京邑。以才謂稱。今二十年矣。屢試劇郡。政最卓然。南海巨屏。實控百粵。去朝廷遠。委任尤重。章貢壤地相接。不惟通知風俗之宜。南方亦久聞爾之名矣。舉以命爾。其爲朕綏編。毗撫蠻蠻。使嶺海之間。不異畿甸。庶有以副朕不忘遠之意。

知靜江府趙思集英殿修撰提舉江州太平興國宮

敕具官某。朕擇才而用。謀帥尤艱。廣右去朝廷遠。二十五州。綿地甚廣。爾以甘泉舊臣。起家作牧。而兩載之間。內外晏然。治行可觀矣。方圖爾功。而以疾諗。丐閒甚力。何耶。均逸祠庭。遂爾賦歸之志。陞華論議。示予篤舊之恩。尙勉壯猶。毋忘忠報。

年...

...

...

...

...

...

...

...

...

...

# 攻媿集卷三十五

## 外制

### 給事中尤袤禮部尙書

敕官建儀曹。俾司禮樂制作之事。職專宗伯。當用朝廷老成之人。閱一時侍從之臣。極三朝髦俊之選。求之公論。僉曰汝諧。具官某。學極羣書。才兼數器。被眷知于慈辰。參寮竊于儲宮。出入累年。始終一節。禁路論思之益。有衆人之所難。瑣闥封駁之章。至三進而未已。積茲德望。處以文昌。職務惟清。實總夷夔之任。謀猷可告。尙殫稷契之忠。

### 中書舍人黃裳給事中

敕朕惟舜命龍出納朕命。而名官以納言。蓋人君之命。不難于出而望其能納也。瑣闥之職。爲朝廷喉衿。古誼昭然。尤當遴擇。具官某。天資直諒。學力粹深。處之王邸。則有講導之益。擢之詞掖。則推潤色之工。是用授爾以封駁之任。非以序而遷也。事有不可爾則盡言。言而可從。朕不吝改。惟能知舜所以名官之意。則能體朕所以命爾者矣。

### 太常丞章穎軍器少監

敕具官某爾以倫魁之彥。〔案〕倫魁見漢書揚雄傳。是集屢用之。一本改倫爲倫非。端諒有聞。進丞容臺。預職史筆。王邸講誦之益。天官銓綜之公。惟時名流。兼此數器。俾貳戎監。是曰序遷。萃之象曰。除戎器。戒不虞。此亦急務。尙勉之哉。

吏部員外郎汪義端監察御史

敕具官某。朕選任臺端。增置諫列。惟六察之分職。非一人之可爲。泛觀在廷。識擢自我。以爾蚤先衆俊。屢試長才。風儀凜然。有御史之望。聲譽藉甚。乃故臣之家。俾踐世官。往贊而長。屢更劇郡。尙何學邑之拘。輟自名曹。庸示簡僚之重。其祗朕命。往振臺綱。

右正言胡瑒左司諫

敕具官某。朕擢卿諫省。亦旣再歲。端靖有守。論事加詳。蓋聞古者有爭臣七人。爾獨賢勞。念之久矣。增置諫列。俾正左虛之位。其益究乃心。暨乃僚。相與補拾闕遺。以輔不逮。俾朕導諫之風。有聞于世。亦惟休哉。

監察御史何異右正言

敕具官某。臺諫之選。俱爲甚重。而職務自有不同。臺臣當糾官邪。而諫省專裨主闕。爾爲六察。亦旣年餘。屢進封章。凜有風采。今予授以拾遺之職。滋嚮用矣。以義豸之風。盡造郤之益。則朕有聽言之美。而爾亦無愧于古爭臣矣。

大理評事王補之大理寺丞

敕具官某。爾家傳文法。久任廷評。遂爲同列之首。賢勞著矣。丞貳之職。命爾遷焉。罪疑惟輕。繫古之訓。移



情就法。尙戒于茲。

寶文閣直學士程大昌龍圖閣直學士提舉南京鴻慶宮

敕。朕收覽羣才。緬懷耆德。矧東宮賓友之舊。游從琳館之游。冠西清學士之班。爰峻河圖之直。具官某。才高而能下。氣勁而用冲。幼學壯行。曾不渝于一節。出藩入從。實有聞于三朝。退食自如。著書不輟。仰天觀象。窮義經八卦之文。畫地成圖。洞禹貢九州之域。茲繼廩人之粟。益高延閣之名。故國有世臣。尙賴典刑之重。乃心在王室。毋忘猷告之忠。

皇伯嗣秀王伯圭故妻秦國夫人宋氏追封兩國夫人

敕。伯父行尊。已極三公之貴。夫人德配。盡疏二國之封。雖不逮于生榮。顧可稽于卹典。具封某。起由戚閑。歸我宗英。動惟圖史之遵。居有珩璜之飾。少同甘苦。能與家人而忘貧。晚被寵光。固宜君子之偕老。云胡不淑。弗永其年。賜湯沐之大邦。旣屢頒于翟菲。兼公侯之兩社。爰特畀于蜜章。〔案〕蜜章本諸晉書山濤傳所云。蜜印。是集慶用之。一本說蜜爲密。或改作宸。亦非。以伸伉儷之情。以厚幽冥之渥。尙惟精爽。式克欽承。

御史臺檢法官李謙太常丞主簿彭龜年司農寺丞元係林大中辟差。大中與張叔椿再辟辭免。

敕。具官某等。爾謙篤信好學。表裏無玷。爾龜年剛毅近仁。氣節有聞。又皆憂深思遠。有拳拳愛君之心。御史選也。大中之辟。叔椿之留。豈其私哉。而引義慨然。若不可一朝居者。朕旣不汝捨。爾高爵非所以留之也。容臺農扈。分以命汝。丞哉丞哉。其少安之。以俟選擇。

都官員外郎趙謚戶部員外郎主管左曹

敕具官某爾祖父以直道佐中興配饗高廟子孫苟在仕版以次拔用今位于朝惟爾一人外奏筠陽之課內爲秋官之屬恂恂自守尙有家風遷置左民毋懈于位

趙思璫知德慶府

敕具官某海康雖遠以高廟潛藩而增重選侯亦不輕也爾以宗支之秀資歷寢高往撫是邦毋忽民事都大提點坑冶鑄錢耿延年兩浙轉運判官

敕具官某部使者分行諸道在外則鍾官總貨泉之重在內則畿漕任飛輓之繁皆遴選也爾長于心計敷歷已深新安之政與仆植儼徹于予聽鼓鑄以佐用度又優爲之計臺虛位亟以命汝式過其歸以副朕爲官擇人之意

陳揚善知光州

敕具官某浮光舊爲內郡今實竝邊牧民之任不輕畀也以爾嘗守輔邦見稱辦治自去郎省家食有年茲庸授以左符往臨邊徼撫民以寬處事以靜其庶幾乎古之折衝者矣

知湖州趙不迹都大提點坑冶鑄錢

敕具官某爾秀出宗支以才自奮三試劇郡辦治有聞惟時鍾官究山澤之利興鼓鑄之饒以佐國用非心計優長風力強敏之士不足以當之輟自吳興俾趨臺治檢柅吏奸導疏利源匪急匪徐惟正之供則

爾之職舉矣。

知平江府沈揆司農卿

敕具官某。朕臨御丕圖。求賢如渴。儲闈寮案。選用無遺。蓋舉予所知。非止篤舊故之恩也。爾以儒學奮身。周旋清貫。詞藻之發。追配前良。肆朕纂承之初。最先收召。出守劇郡。試之益詳矣。漢二千石有治理效。公卿缺則選諸所表。朱邑由北海入爲大司農。則其事也。朕之待汝。豈惟掌周稷之事哉。往祗厥官。嗣有褒陟。

呂大麟知常德府

敕具官某。本朝衣冠之族。爵位相望。文獻不墜。未有盛于呂氏者也。至于今日。仕者寢寡。慨然念之。起爾于家。以爾素守家法。好學不衰。宰郡有循良之稱。在朝謹靖共之守。去國既久。退然自安。武陵湖右奧區。外控五溪之徼。思得賢牧。以撫安之。故舉以命爾。爾尙勉哉。能大其家。則爲報國。

左丞相留正初除少保封贈

曾祖贈太師耀卿追封英國公

敕朕任賢甚專。虛己以聽。累奏篇之賞。蓋膺八命之崇。覽遞牘之勤。始進三孤之重。乃循故事。加賁曾門。具官某。生爲善人。世載隱德。傳芳中古。由王國大夫之有聞。席慶華宗。去清源節度之未遠。惟躬行無媿。于幽顯。故家聲大啓于孫曾。是生名儒。致位上宰。閱書屢錫。已登極品之官。公社肇開。爰胙真陽之土。尙

惟精爽。歆此寵靈。

曾祖母周國夫人藥氏贈周國夫人

敕。士有奮身而仕。至元臣。推恩而爵。及曾祖。嘗迹所自。必有其原。豈惟奕世之賢。仍多中饋之助。夫或加寵。婦則從之。具封某。以柔淑之資。孀儒素之族。積功累行。雖有良人之賢。處順安時。宜偕君子之老。比及後裔。是生上台。封既至于小君。寵仍疏于大國。不改周南之舊。用配留侯之祧。其祗異恩。以利後嗣。

祖贈太師沂國公寔追封福國公

敕。德雖著州鄉。而弗顯于朝廷。身不及富貴。而乃施乎孫子。此古人敢以自必。而天報昭然不誣。我有宗工。恩逮顯祖。具官某。坦坦幽人之履。恂恂長者之風。惟先世以來。有功于國。故餘慶所及。遂肥其家。果見聞孫。進登孤保。屢頒霈澤。貴極師垣。乃更沂水之舊封。仍祚閩山之鄉國。九京未泯。百世不忘。

祖母楚國夫人洪氏贈商國夫人

敕。婦道之修。相夫以順。家法之懿。至孫而興。雖寵榮不及乎生前。而恩渥屢加于身後。具封某。以幽閒之操。崇節儉之風。夫婦俱賢。蓋非一日之積。室家流慶。遂見百年之餘。賜湯沐于南荆。易封圻于上洛。以顯漏泉之澤。以慰含飴之思。

父贈太師衛國公鑄追封魏國公

敕。朕惟東周大夫。留氏號稱世賢。子國。子嗟之父也。俱不見用。詩人惜之。此丘中有麻。所由作也。朕之用

賢則異于是。具官某。世有潛德。生爲醇儒。雖富貴不在其身。而善慶乃積于後。惟我碩輔。秉國之鈞。尊顯其親。貴極人臣。斯教忠之效也。旣胙武公之土。復更畢萬之封。父子之賢。于是俱顯。視東周之留爲盛矣。死而不亡。其尙知歆。

前母燕國夫人鄭氏贈齊國夫人母秦國夫人劉氏贈魏國夫人

敕。婦爵從夫。已極小君之號。母貴以子。洵更大國之封。具對某。迪德靜專。處家約素。相夫以禮。躬孟光舉案之勤。教子能賢。慕軻母擇鄰之訓。相予初政。致位上台。秩旣進于三孤。貴遂登于累葉。表茲閭範。用配禰宮。改北國之舊圻。昇東藩之新邑。劉氏。改四塞之舊邦。昇大名之新邑。申加閱冊。增賁宗祧。

故妻魏國夫人徐氏贈秦國夫人

敕。朕寵任大臣。躋榮孤保。爵旣加于祖禰。恩又及其閨門。具封某。生有令姿。居循內則。知巨源之識度。相待如賓。勉仲卿以激卬。及見其貴。雖隔幽明之際。仍深伉儷之情。夏冢通楹。顯漢相元勳之重。魚軒象服。開秦川大國之封。九泉有知。千載無憾。

大理卿王善之直龍圖閣知平江府

敕。具官某。吳門地大物阜。隱然東南一都會也。爾生長浙右。固已習知其風俗。又嘗持節臨之。聲聞藹然。至今未忘。矧明練憲章。飾以儒術。再長廷尉。滋嚮用矣。抗章求外。自詭治民。爲爾相攸。無踰于此。界以義圖之直。用寵爾行。豈惟不減昔人畫錦之榮。吏民聞之。不戒以孚。足以寬吾顧憂矣。

浙東提刑陳倚除大理卿

敕具官某。國家以臬事付廷尉。而立制視古爲詳。治獄者無預于定法。斷刑者不使之鞠囚。而卿實總之。選顧不重哉。爾習于憲章。而持心近厚。由廷評而上。至于爲長。踐敷有年矣。綰建寧之符。持浙東之節。又皆有稱焉。肆疇已試。還爾舊物。囹圄屢空。病未能也。爾能盡心。使刑獄號爲平。則庶幾乎古矣。

知雅州宋南強知金州

敕具官某。金城外控邊陲。內連巴蜀。有民有兵。號爲价藩。延燔之餘。正須長才。以任郡寄。擇人于內。豈曰無之。臨遣而行。慮不及事。疇咨西南之守。就以遷焉。以爾有志事功。敏于從政。其解蒙山之組。往撫漢陰之民。此而有聞。朕將用汝。

木待問知湖州

敕具官某。儒科首選。宦達相望。儲禁舊僚。收用略盡。慈皇初開南省。爾則爲多士之先。沖人頃居東宮。爾則任端尹之寄。而十年以來。欲仕輒已。朕嘗念之。惟近臣爲明當途之誣。浮議遂定。吳興劇郡。視古左馮。衆所憚爲。舉以試汝。勿以多言爲畏。倚需最課之聞。高爵美官。豈于汝吝。

費培大理評事

敕具官某。李官選屬。必先試以文法。然對有司之間者。易爲工。察庶獄之情者。難于盡。爾爲廷評。其以昔之所習。見于詳讞之際。遇事加勉。增益其所未至。不倦以終之。則爲稱職。

福建提刑辛棄疾太府卿

敕具官某爾蚤以才智受知慈屐盤根錯節不勞餘刃中更閒退以老其才養邁往之氣日趨于平晦精察之明務歸于恕朕則得今日之用焉召從閩部長我外府夫氣愈養則全明愈晦則光予以見之事功孰能禦之哉

顏師魯知泉州

敕均佚異祠遂彭澤賦歸之志起臨舊鎮慰潁川願借之心匪曰朕私徒得君重既去家之不遠俾便道以有行具官某學茂儒先朝推壽俊慨孔戮之去命典外藩念陽城之勞許歸故里而遠忙懷其惠政賈胡服其真清攀轅莫留垂涕相踵此誠心之所感非人力之能爲既徹聽聞重增嘉歎方遴選惟良之守要先求已試之才追常袞之遺風當一變于閩俗用蔡襄之故事宜再領于泉廳式過其驅以副所望

新寧國府林大中知贛州

敕具官某章貢居江右上流控楚粵之要民俗果悍可以義服不可以力勝也非清德雅量練達世務者不在師帥之選爾以不羣之資爲有用之學治縣如古循吏入朝爲才御史彈劾不避于權要論議率中于事機橫楊之風振于一時朕既分爾以宛陵之符念其家食易鎮茲地先聲所臨百吏望風撫予南邦以寬憂願朕豈汝忘哉

廣東轉運判官黃掄再任

敕具官某。朕分遣諫官御史。使行諸道。以廉察列郡之吏。知予德意。多稱其職。爾以端諒之資。選在諫省。去國未幾。使于嶠南。善最有聞。俾之因任。既以慰斯民。願借留之意。又以見朝廷不忘遠之仁。毋替厥初。嗣有褒寵。

宮人王安安轉郡夫人

敕。朕謹乃儉德。固無漁色之私。選于後宮。亦若審官之遴。宮人某。稟資婉嫕。祇事靜專。被樛木之恩。蚤預內廷之御。承小星之惠。躡升名郡之封。其益習于虛彝。庶克綏于寵數。

直龍圖閣知贛州楊萬里祕閣修撰提舉隆興府玉隆萬壽宮

敕。具官某。朝廷之于賢者。用而盡其才。上也。用未盡才而勇退。寵其歸而全其高。次也。上焉者。朕之本心。次焉者。非得已也。爾以清節雅道。冠冕一時。高文大篇。追配古作。出入中外。聞望日休。計臺丐歸。俾守章貢。古郡臥治。庶以優賢。抗章自列。欲留不可。畀真祠之佚。升論讓之華。詩不云乎。雖無老成人。尙有典刑。朕不汝忘也。

祕書丞陳損之淮東提舉

敕。具官某。常平使者之任重矣。淮東鹽筴。甲天下。視他路尤重。貨泉所聚。出入萬計。調度低昂。在一路。部使者事又重焉。爾起西蜀。慨然有志于當世。通練閭敏。遇事風生。周旋清塗。久攝宰掾。彌綸省闕。備著賢勞。視其官可以知其才矣。頃護使客。往來淮壘。歸論利病。如示諸掌。茲因求外選。而用汝。勉哉。思所以稱



任使之意。

起居舍人陳傳良經進壽皇聖政轉一官

敕具官某。朕惟壽皇在御。務行聖人之政。二十有八年。傳祚菲躬。懼弗克堪。既已申飭史臣。謹以事繁日之書。又掇其大端。可以為法于萬世者。別為一經。追儻二典。真我家之盛事也。爾以一代名儒。晚登郎省。親擢道山。付以史事。奏篇來上。奉之慈極。從容進讀。冠珮儼然。茲焉論賞。盍先于衆。命增一秩。以示儒者之榮。尙惟欽哉。

浙東提舉陳杞本路提刑淮東提舉衛涇浙東提舉

敕具官某等。浙東部刺史。萃于會稽。密邇行都。視他部為重。杞以辨治之才。為常平使者。就畀臬事。任益高矣。涇以倫魁之彥。領淮甸鹽筴。改授蕩節。地益近矣。其各揚乃職。使刑罰無冤。公私兼足。以副朕選掄之意。

武翼郎左翼軍統制韓俊供職滿十年轉一官

修武郎馬軍行司選鋒軍統制李郁同

敕具官某。爾出自禁旅。護戎泉南。李郁改陪都既歷十年。內外靖謐。雖功名無事。以自見。賢勞著矣。俾循故實。序進爾階。益習韜鈴。以俟選用。

參知政事胡晉臣知樞密院事

敕朕纂承丕緒。圖任舊人。一日萬幾之繁。既久勤于裨贊。三軍五兵之本。茲益厚于倚毗。乃播綸言。式彰

枋用。具官某。氣全剛大。識造精微。以端靖結慈皇之知。以忠純爲初政之輔。同心同德。人孰知房。杜之功。嘉謀嘉猷。日惟陳堯舜之道。居宜鎮于雅俗。動有助于沈機。察其所安。任以不貳。矧一登于政地。凡三入于樞廷。諒憲度之愈明。畀事權而增重。噫。予欲務孝宣之周密。以起治功。爾其慕子房之從容。用符眷意。願惟宿望。奚俟多辭。

同知樞密院事陳駁參知政事

敕。贊本兵于右府。方藉壯猷。圖共政于邇聯。尤資宿望。我有明命。告于具寮。具官某。學探聖源。才周世務。立朝審諤。素爲君子之儒。處事精詳。居有大臣之體。升之常伯。擢在機廷。陳告后之謀猷。簡而甚切。贊基命之宥密。靜以無譁。雅量鎮浮。不改其度。正身率下。敢干以私。曾不俟于期年。俾進陪于大政。國以永賴。人無異詞。噫。謨明弼諧。朕有望股肱之助。任重道遠。爾其推腹心之忠。永孚于休。以副所屬。

吏部尙書趙汝愚同知樞密院事

敕。西漢以同姓疏封。不在公卿之位。東平以至親輔政。厥由聲望之隆。惟我本朝。尤厚皇族。始則優加祿爵。曾弗仕于外廷。後雖竝用親賢。亦無踰于法從。茲開宥府。蓋得宗英。具官某。派出天潢。望高國器。早隨寒雋。首冠于儒科。出任藩宣。久臨于蜀郡。侍經帝幄。選士貢闈。皆故事之所無。在爾身而兼備。爰以樞機之寄。託之肺腑之親。必有若人。乃堪大任。匪固私于異渥。將深慰于公言。噫。開國以來。未有今日非常之舉。本兵至重。當展平生有用之才。以增磐石之光。以壯維城之勢。

刑部郎中沈樞度支郎中

敕具官某。爾生長相門。明習文法。爲郎憲部。恪守三尺。司度之職。凡軍國之用。會其入出。以周知經費之數。欲得清謹之士爲之。故以爾遷焉。勿以郎潛爲淹。思所以稱其職者。

太府寺丞沈作賓刑部郎官

敕具官某。郎官必由宰郡而除。憲部必以明法而授。行之舊矣。爾出名閥。通習憲章。久歷廷尉之屬。宜在茲選。向守丹丘。曾不煖席。而去郡之日。遮道借留。其必有以得此者。再入脩門。養資外府。而後遷焉。朕之用爾審矣。惟盡乃心。以稱斯舉。

右司員外郎應孟明左司吏部員外郎徐誼右司

敕具官某等。宰掾非他官比也。調護關決。皆天下事。非有才識。可以爲守常應變之助者。疇克爲之。爾孟明介然有守。練達民事。爾誼能爲可用。通貫治體。一以序遷。一以選授。朕方委政于二三大臣。惟爾分任其勞。使大臣得以綱紀庶務。助朕求賢。以起治功。豈小補之哉。

度支員外郎王厚之直祕閣兩浙路轉運判官

敕具官某。朕惟轉運之任。莫重于畿內。祇承慈訓。率用士人。比年以來。多稱其職。爾庠校諸生。故家人物。好古博雅。風裁素高。克勤小物。而知大體。領使淮西。聲望籍甚。爲郎名曹。侃然有守。還界道山之直。兼按浙河之間。飛挽以時。而用不乏。調度有經。而民不病。表率諸道。尙其勉哉。

監都進奏院朱致民大理司直

敕具官某詩云彼其之子邦之司直國家明謹用刑遂以名李官之屬近復定制審閱奏當尤不可以輕授也爾以儒學自奮而宰邑丞郡循良有稱入班于朝靖共爾位選以命汝往哉惟欽

司農寺丞彭龜年祕書郎

敕具官某朝列多士皆以賢選雖不以日月爲功要必使宿其業爾丞大農屬耳茲又命典中祕書朕不以爲煩人亦無得而言以爾之才望有以當此也道山羣玉之府涵養天下英才異時臺閣高選于此乎取何止讀未見之書而已哉

中書門下省檢正楊經太府卿四川總領湖北轉運副使張抑太府少卿湖廣總領

敕具官某等國家東巡吳會宿兵楚蜀示天下以形勢給餉之任必選王人居之爾經奮身西南老成詳練樞屬宰掾裨助爲多間以蜀事了辯如響是用使爾于蜀爾抑起自故家見聞殫洽屢持使節所至可紀荆湖風土尤所諳歷是用使爾于楚寵以外府長貳之任將命以行爾二人皆儒士其有以適緩急之宜無乏興無病民使上下百城不擾而兼足相安而有恃則朕之顧憂可寬矣

新知湖州木待問改知婺州

敕具官某浙河以西吳興爲輔藩浙河以東婺女爲名郡視邦選侯委任惟均爾少爲舉首聲振東南從吾春宮徧歷寮案念投閒之既久命起家而作牧引嫌自列易地爲宜是行也非惟不使汝遠去畿甸苟

盡心焉。課最易聞。公論自此而定。則朕之眷汝。人無間言矣。

宣教郎史彌廓係秀王孫女夫轉一官

敕具官某。爾以師臣之子。娶秀邸之孫。不習貴驕。能勉家舉。推恩爾室。遂進以官。往其欽承。益務修進。

朝奉郎給事中黃裳朝散大夫權工部侍郎謝深甫磨勘轉官

敕嚴吏銓之課。所以示百寮之公。優法從之聯。猶不忘三載之考。具官某。再登朝著。亟上禁途。朱邸橫經。

久藉講磨之益。瑣闥批敕。尤高論駁之風。謝深甫云。翹翔朝著。密勿禁途。三輔政清。久資于彈壓。貳卿任重。尤賴于論思。茲以年勞。應于治典。爰

陟文階之等。寢陞官簿之華。其服恩榮。尙殫猷告。

張允中該修玉牒循從事郎

敕具官某。慈皇寶牒之成。一代之鉅典也。爾爲胥吏。預有勤勞。既登仕版。併進二階。

知秀州趙充夫改知湖州

敕具官某。爾守臨汀。政最徹聞。擢之嘉興。尤號辦治。理財則不擾而集。御吏則不惡而嚴。民甚安之。湖在

近輔。最劇。就以畀汝。近歲皇族人才輩出。爾宜在政事之科。益勉所長。爲諸郡率。朕將有以表異之。

太學正顏斌知常州無錫縣吳獵潭州教授項安世召試竝除秘書省正字

敕具官某等。國家開館閣以待天下士。若必循次而進。非所以示招延之廣也。博採公言。取以數路。爾斌

由舍法官學省。爾獵方宰壯縣。爾安世客授湖南。一聞其賢。俱命給札。前此殆未有也。指陳時務。蔚然可

稱登之冊府。遂列英躔。豈惟養有用之才。抑以爲多士之勸。庶幾巖穴之彥。亦將樂從吾游焉。

戶部員外郎趙謚陸郎中

敕具官某。近歲郎選日重。非外庸之著。不在此選。非資歷之深。猶置員外。爾以名臣之孫。更踐蘭省。積其吏攷。就正厥名。官簿寔高。益思加勉。

蘇大任太學正

敕具官某。眉山蘇氏。文獻相望。爾雖派別。以學自奮。朕覽薦牘。召真學館。得天下英才而教育之。何樂如此。益勤教事。勉繼前良。

趙不遷知西外宗正事

敕具官某。國家宗支日盛。散處郡國。而溫陵長樂。猶循南西二京之舊。各有司存。以爾行尊而性淑。奮由儒科。練達政事。往其主盟。糾合吾族。撫摩孤弱。而使之得所。教獎孝秀。以率其不良。振振麟趾之風。庶有望焉。

江東提舉黃輔戶部郎中主管右曹

敕具官某。聚天下賢士。列之朝行。必更外庸。而後收用。非惟欲重郎選。亦以詳試人才。亨途由是而之焉。不輕畀也。以爾馳聲膠庠。資敏而練世故。使行江左。得部刺史之體。召對便朝。嘉其忠盡。戶曹動關民事。號爲劇煩。往旣乃心。以副選擢之意。

煥章閣學士知襄陽府張杓徽猷閣學士知建康府

敕。憑熊軾于上游。久資填撫之略。昇麟符于重地。尤藉保釐之方。是為留籥之司。增峻寶儲之職。具官某。性資闔敏。智識縱橫。樂父兄之賢。源流有自。登侍從之選。敷歷已深。遇事敢言。詞鋒甚厲。臨機輒斷。才刃有餘。輟自文昌。出當方面。果肅清于邊徼。務宣暢于王靈。矧是秣陵。實雄江左。石城鍾阜。六朝之風績猶存。大纛高牙。先正之威名未遠。俾居連帥。益振家聲。想具有于成謨。顧何煩于多訓。

顯謨閣待制知江陵府章森煥章閣直學士知興元府

敕。荆楚奧區。無若江陵之重。巴蜀外蔽。實賴漢川之雄。我有侍臣。更此名鎮。峻增延閣之職。用寵元戎之行。具官某。稟氣沖和。受材宏達。早被知于慈辰。亟登任于禁途。司留籥于陪都。既騰善最。建高牙于南郡。久殿上游。眷炎劉始封之邦。為元德必爭之地。〔案〕此稱蜀漢昭烈帝之字。宋時避廟諱。故改作元。雲屯萬竈。虎視三秦。誦武侯出師之章。諒其素志。審漢將登壇之策。勉乃壯圖。毋有遐心。往祇成命。

王蘭知江陵府

敕。運魁柄于西樞。嘗贊幄中之畫。開帥藩于南紀。茲分闔外之權。惟任舊人。式孚羣聽。具官某。器資夔挺。智識開通。世傳許國之忠。躬負濟時之略。明目張膽。在朝廷無事不言。聚精會神。故君臣不膠而固。輔予初政。正位本兵。機謀足以折千里之衝。文武足以為萬邦之憲。退安祠館。寢閱歲華。蜀道登天之難。曲從私請。荆州用武之要。勉為朕行。諒無俟駕之淹。倚聞洗印之報。噫。比周家之分陝。尤屬宗工。據天塹之上。

游是爲重鎮。尙體規恢之志。豈惟填拊之圖。

知興元府宇文价知襄陽府

敕。唐制以山南分東西二道。西則漢中。爲巴蜀之捍蔽。東則襄陽。爲荆郢之北門。以是俱號重鎮。而控扼之要。于今尤切。謀帥其可輕乎。具官某。以學奮身。世有名德。壽皇眷知。擢真華近。遂居文昌八座之選。出鎮漢中。于今五年。撫安軍民。帖帖無事。襄陽易地。委任惟均。方時小康。邊鄙不聳。輕裘緩帶。折衝樽俎。以追羊祜之遺風。不亦善乎。

錢象祖吏部員外郎

敕具官某。吏部之司七。而右選最爲劇曹。涉筆終朝。猶恐不逮。非夫精敏詳練之士。不足以察吏奸而澄弊源也。爾明習吏事。飾以儒雅。分符持節。民庸茂焉。爲郎未幾。銜恤而歸。不俟造朝。亟加選用。靜以制動。要以御詳。汝知之矣。尙其勉哉。

將作監主簿李大異司農寺丞軍器監主簿曾三聘太府寺丞

敕具官某等。大農外府。分領食貨之重。各設之丞。以贊其長。非才不授也。爾大異。強記洽聞。處事有條。爾三聘。篤學厲操。持論不苟。簿正兩監。退然安之。竝進厥官。各任以事。以才自見。今其時矣。

秦楨知嚴州

敕具官某。爾生長大家。少而穎悟。力學進德。譽者交口。古括之政。無愧循良。嚴陵爲高宗潛藩。密邇行闕。



選而用汝詳試其才。益撫吾民。以稱朕意。

吳宗旦知舒州

敕具官某。龍舒在淮右爲名郡。士大夫以剖符爲樂。而朝廷必選才而後授之。爾以學自奮。明練憲章。法家者流。自以爲不及也。律身範俗。清裁可紀。家食寢久。精力未愆。往居專城。綏靖淮服。列卿之舊。朕豈汝忘。

權貨務監官修武郎陳仲堅董淵孫侁收趁增羨各轉一官

敕具官某等。摘山鬻海之利。權之以佐用度。其數實廣。爾等協心奉法。歲有贏貲。何愛一官。以勸來者。

新江西運副錢端忠改江東運副

敕具官某。爾以王人。給餉江淮。才謂著稱。俾之將漕。需次已久。持節有行。小疾來諗。尤見廉靖。爲爾易地。以遂其私。輔養精神。庸俟器使。

幹辦審計司劉三傑將作監主簿王恬軍器監主簿

敕具官某等。爾等在太學爲名流。試劇邑爲良吏。以薦入朝。歲月當遷。分命以勾稽之職。而處三傑于大匠。恬于戎監。職清而務簡。益養賢望。以俟甄拔。

江西路轉運判官林湜吏部郎官

敕具官某。尙書郎爲當今妙選。朝行雖有名士。必更外庸。而後授之。爾嘗義豸冠。凜有風采。按刑浙東。將

漕江右久攝帥閫所至有稱。賜環而歸。敷奏詳雅。資望高矣。然猶處之小選。所以重銓綜之任也。其究乃心以贊而長。

# 攻媿集卷三十六

## 外制

國子司業彭椿年除祭酒

敕具官某。祭酒尊者之稱也。荀卿在齊。最爲老師。蓋三爲之。後世遂以名胄監之長。非夫儒先哲艾。德音俱尊者。豈輕畀哉。爾蚤以文行。表于諸生。歷官朝行。好禮不變。擢居小司成。士論久已厭服。爲國學師。無以易汝。往哉。惟不言而躬行。使人益觀感于規矩之餘。則首善之風振矣。

樞密院檢詳李祥國子司業

敕具官某。成均教事。師道貴尊。近歲雖長貳不並除。而爲士擇師。不應以此爲拘也。爾馳譽膠庠。見謂前輩。文學行誼。久服衆心。諒直簡嚴。不移素守。郎潛以來。藹有師儒之望。茲庸命以少司成之職。追還古風。變而至道。予以副朕作成之意。尙勉之哉。

左司諫胡瑒司農少卿

敕具官某。朕之用人。謹守成憲。惟爾之用。獨異他人。始以編摩見于便朝。奏對詳雅。朕心嚮焉。擢典中祕。遂居六察。居無幾何。徑登諫垣。期月之間。屢獻忠諫。引嫌自列。執義不回。俾貳大農。豈朕初志。往祗乃事。

庸俟甄升。

同知樞密院事趙汝愚初除封贈

曾祖東頭供奉官士慮贈太子少保

敕國家親睦九族。本支蕃衍。侯王使相。寵祿相望。然雖在近屬。無子孫贈典之文。惟爾孫曾進秉事樞。追榮之恩。上及三世。有宋以來。實自汝始。豈不榮哉。具官某。胄出熙陵。慶綿漢邸。生長承平之日。涵濡信厚之風。不顯其躬。以齋于後。本兵之任。我得宗英。推迹本原。寵之宮保。璽章之渥。賁爾九京。

曾祖母龔氏贈高平郡夫人

敕士大夫遭時遇主。致身兩地。必有慶源之自。仍多內助之先。矧在吾宗。可無異渥。具封某。婉孌之質。幽閒之度。克相夫子。寔大其家。孫又生子。起爲公輔。旣錫曾門之寵。併推婦爵之崇。惟沁水之名邦。實河東之沃壤。以示廟祧之寵。以增屬籍之光。

祖贈秉義郎不求太子少傅

敕唐之宗室。大用者九人。而李適之爲稱首。追榮乃祖。褒冊典物。焜照都邑。行道咨嘆。著于史牒。今爾之寵。視古過之。具官某。稟資甚賢。爲善知樂。雖事功不見于世。而隱行實侔于天。是生聞孫。首致樞近。旣嘗逮事。當揆所元。用推黃壤之恩。爰授青宮之傳。三錫之命。尙其未央。

祖母太孺人晁氏贈咸寧郡夫人

敷惟晁氏世有名士。在濟北號稱華宗。女教既嚴。壺彝可紀。矧來歸于天族。乃深篤于義方。宜有後人。克顯先世。具封某。結縞之訓。蓋自家傳。采蘋之儀。實遵禮度。相夫以道。躬德履齊眉之勤。有子甚仁。兼仲由負米之養。三遷之教。燕及元孫。（案）元孫之元。宋時通廟諱所改。一命之榮。胙之大郡。是爲陽報。尙服殊恩。

父贈大中大夫善應太子少師

敷躬行之實。莫著于隱微。天報之昭。殆同于影響。苟能用一日之力。何必活千人而興。惟深仁厚誼。有以過絕于人。則陰功隱德。終當暴白于世。具官某。生長富貴。遭罹險艱。救水僅充。而事親有臥冰躍鯉之孝。伏臘未給。而於人有解衣推食之仁。片言可質于神明。一飯不忘于君父。教忠之訓。既著生前。篤行之名。遂彰身後。朕方命爾元子。貳吾西樞。察其許國之忠。想見過庭之學。寵之師範。冠彼儲僚。豈惟禰廟之是崇。抑亦宗盟之未有。尙其英爽。式謹欽承。

母淑人李氏贈安化郡夫人

敷朕顯登樞筥。旣以崇趙氏之祧。加黃幽原。其可忘孟母之訓。具封某。生自名門。歸于寶祿。兼志靜專。與少文而協趣。處家約素。爲彭澤以忘貧。一門相勉。以孝慈奕世。俱傳于清白。是有賢子。爲予輔臣。爰開順化之封。用示追榮之寵。毋重杯棬之感。庶寬霜露之思。

妻淑人徐氏贈都陽郡夫人

敷朕竝用親賢。延登宥密。雖曰家傳之懿。如麟趾仁厚之風。亦惟闔助之良。有雞鳴警戒之道。宜與偕老。

胡不永年。用加寵榮。以資冥漠。具封某。天資柔淑。婦德慈祥。冊府道山。才及見夫子英游之際。副筭霍弗。傷不逮小君命服之榮。獨惟南渡以來。久寓楚東之近。始封此郡。尙慰爾靈。

知夔州趙鞏江西路轉運判官

敕具官某。爾起書生。有志當世。頃由名曹。出鎮淮右。莘莘邊備。論奏相踵。易帥夔子。民夷帖服。事有當辯。不已于言。可謂首公忘私者矣。大江之西。漕事爲重。引以漸近。朕意可知。順流而歸。祇率厥職。

江西提刑劉光祖知夔州

敕具官某。夔子之國。介于楚蜀之間。山川險固。民夷雜糅。謀帥之重。必惟通才。爾正色立朝。號稱敢言。出擁使輅。威望日聳。旣授以江右之節矣。尙茲家食。非以優賢。分闕之寄。易以命汝。亟其洗印。以安遠民。

知昭州莊方知瓊州

敕具官某。瓊管以四州之壤。屹立海中。實與番禺。相爲引重。大輻獻琛。賴以爲歸。麾符不輕畀也。爾進由儒科。練達吏事。貳郡賓水。承流昭潭。必能習知南海之俗。往其輯寧蠻蜚。勞撫賈胡。以稱朕選侯之意。

軍器少監章穎左司諫

敕具官某。古者箴規之求。下逮工瞽。矧位于朝。孰不進言。以諫名官。視古已狹。選用之際。其可不嚴。爾蚤以倫魁。寢登華序。清標直節。照映周行。約史東觀。橫經朱邱。端靖無華。物自宗之。擢居諫垣。允協時望。山甫補袞職之闕。孟子格君心之非。尙惟勉旃。以伸素蘊。

將作少監黃艾右正言

敕具官某諫省設官備矣大夫而下幾于古諍臣之目比方並建遺補俱以引嫌而去妙選時彥乃今得之爾抱負不凡學為有用言簡氣勁宜備諫列輟自王邸命以拾遺爾其振厲風采別白是非引經据古以佐朕之不逮將虛己以聽焉

資正殿學士正奉大夫蕭燧轉一官致仕

敕朕睠言故老方深仄席之思遽覽封章乃有垂車之請勉從所志殊拂予懷具官某洪毅而裕和〔案〕洪毅之洪宋時避廟諱所改閱深而肅括擢儒科于紹興之際登朝蹟于乾道之初自結主知蓋正人無待于助久司言責使天下想聞其風遍儀論思獻納之班遂參輔贊彌縫之用粵從去國亦既累年臥疾清漳與鄴下文人之詠掛冠神武慕山中宰相之高爰序進于崇階以曲全夫晚節噫漢疏知止既永謝于軒裳蕭傅素剛尚勉親于藥石

蕭燧贈金紫光祿大夫

敕舊弼退休方徇辭榮之戀奏函踵至驚聞垂絕之言撫往事以慨然愴吉人之已矣具官某名高一代仕歷三朝官以諫為名真得諍臣之體后非賢罔乂俾參讓嘏之尊雖為故里之歸尚佇壯猷之告云何屬疾亟願乞身載覽遺章尚想伏蒲之氣優加卹典以彰告第之恩庸寄予悲務昌厥後噫求馬周儀形之見遂隔九京歌晉公柱石之衰重增一涕

知建康府余端禮吏部尙書

敕。朝列選曹。妙簡持衡之任。位登常伯。尤高荷囊之班。茲得名臣。式符時望。具官某。稟資洪毅。履行精純。慈展結知。蚤預甘泉之侍。儲闈列屬。久陪少海之游。頃出鎮于雄藩。實典司于留籥。既聞報政。亟命還朝。矧惟十載以來。屢歷三銓之劇。士論夙推于平允。吏行素憚其嚴明。乃于晝接之餘。寵以天官之舊。老成復進。豈惟躬簿書期會之繁。忠蹇自將。正有賴朝夕論思之益。其祇成渙。用副虛懷。

湖北提舉張孝曾夔路提刑

敕。具官某。夔子一道。視四川爲差近。而山川深險。雜以夷蠻。民物凋陋。困于征取。典刑之使。選用不輕。爾出自名家。敏于吏事。持節湖外。斂散以時。往按蜀門。布宣德意。使深山窮谷。舉無冤民。則庶乎得職矣。

右正言何異湖南運判

敕。具官某。朕監觀四方。志不忘遠。寄耳目于部使者。猶恐不逮。故間遣諫官御史以臨之。爾自登朝行。雅有清望。頃因奏對。擢居憲臺。升之諍臣之列。方有賴于規益。引嫌求外。授節湖湘。典司將輸。光華燁然。夫以義鷹伏蒲之風。抗攬轡登車之志。揚清激濁。在此行矣。有猷以告。毋有遐心。

四川制置使京鏜權刑部尙書

敕。朕體列聖寬仁之訓。務謹刑章。求一時忠厚之臣。俾居司寇。久虛此位。今得其人。具官某。器度恢洪。才猷挺特。蚤結慈宸之眷。亟登要路之津。修聘殊鄰。壯蘇武持旄之節。開藩全蜀。慨王尊叱馭之行。百城咸



服其恩威。四載備聞于勞烈。爰示賜環之寵。俾陞聽履之班。錫以贊書。付之臬事。罔兼庶獄。朕方推文王敬忌之心。明用五刑。爾其慕臯陶邁種之德。尙殫辰告。以副予知。

祕閣修撰知紹興府趙不沈職事修舉除集英殿修撰

敕懷會稽之章。久煩填撫。報齊邦之政。可後褒嘉。具官某。分派天潢。服休仕路。頃由淮甸。來任飛芻。輓粟之司。旋尹京都。遂登簪筆。持橐之選。起隨輔郡。就擢帥垣。迨茲期年。知職務之時。舉去此一水。亦譽言之日聞。乃諭柄臣。俾陞寓職。以璽書示勉勵之意。毋曰彝章。使田里亡愁嘆之心。尙圖來效。

梁季璠知光州

敕具官某。爾父在紹興間。以才敏致位文昌。其後未有至二千石者。爾守上饒。政務簡靜。銜恤而去。未究職業。浮光易治。地則被邊。舉以命汝。委寄爲重。尙其勉之。毋忝前人。

李沐吏部郎官

敕具官某。爾以舊學大臣之子。自奮巍科。寔登臚仕。出使閩浙。有志于民。爲養求歸。嘉其靖退。晉接之頃。處以名曹。親庭無信宿之遙。選部乃攝承之舊。往祇厥職。無復固辭。

新知興元府章森改知瀘州

敕開藩蜀部。曾洗印之未聞。易鎮邊陲。又改轄而于邁。惟首公之有素。諒承命而遂行。具官某。知略該通。才猷挺特。進儀禁路。入陪豹尾之嚴。擢殿圍都。出擁麟符之重。由上流之奏課。異西道以折衝。十年而守。

漢中田叔固宜于久任。五月而渡瀘水。武侯豈憚于遐征。矧羣情安集之初。藉元帥撫綏之力。推君子之心。置小人之腹。能坦然而不疑。脫慈母之懷。立嚴師之傍。當翕爾而自定。亟祗成渙。用寬顧憂。

知福州鄭僑知建康府

敕開帥藩于閩嶠。曾未彌年。司留籥于秦淮。茲焉易鎮。渴想儀形之見。亟令郵置之傳。具官某。執德不回。秉心無競。論議遠追于晁董。文章高軋于漢周。正色立朝。尤推批勅之手。至公典選。允藉持衡之權。皂蓋頽春。出臨千里。錦衣行晝。就撫三山。欲改畀于麟符。仍從馳于驛騎。朝受命。夕引道。諒無憚于暑行。退補過。進盡忠。正有資于辰告。入奉受釐之對。徐爲分闔之行。惟我舊臣。服茲休命。

廣東提刑李信甫江東提刑

敕具官某。爾爲御史。直道而行。出守信安。旋使南嶠。皆有聲績可紀。矧錄囚于嶺海煙瘴之地。不憚深遠。勞亦甚矣。抗章求閒。未應捨汝。其典臬事于大江之東。少休馳驅。而後攬轡以行。亦惟休哉。

太府卿辛弃疾集英殿修撰知福州

敕具官某。七閩奧區。三山爲一。都會地大物阜。甲于東南。負山並海。綿亙數千里。舉聽命于大府。連帥之選。豈云易哉。爾以軼羣之才。蚤著事功。壽皇三畀大藩。寵以論議之華。于今幾二十年。召對便朝。擢長外府。益平豪爽之氣。而見溫粹之容。朕心嘉焉。比居外臺。讞議從厚。閩人戶知之。陞之集賢。增重闔寄。往其爲朕布宣德意。撫吾赤子。以寬一面之顧憂。朕豈汝忘哉。

著作郎黃由軍器少監

敕具官某著庭之選最爲清高矧爾以倫魁之英譽謬之氣周旋三館于茲有年徑上要津無不可者然朝廷序進人物不厭于詳薦紳綿歷事任不以遲速計也進貳戎監仍攝劇曹益養資望以俟器使

司農卿沈揆權吏部侍郎

敕古有六官孰若天官之重部分四選無如武選之繁茲擇貳卿宜求吉士具官某高文瞻麗古學精深自登周行雅有清望凡一時華要之選以累載周旋其間壁水道山爲諸儒之領袖儲寮詞掖振六藝之英華屢垂上于禁途復優聞于郡課蔽自朕志召長大農寵之荷橐之聯畀以典銓之寄惟公可以守成憲惟明可以察衆欺倚聞稱職之名用助官人之道

新知襄陽府宇文价改知遂寧府

敕朕惟今日謀帥之難深以數易爲戒卿有大邦遺愛之舊無嫌改命之繁具官某學有家傳才爲世用奮身西蜀膺慈皇特達之知累歲中朝歷儒者清華之選佩印屢更于劍外分符最久于漢中峴首名藩方尋羊叔子之迹遂寧舊治更喜郭細侯之來諒去思之未忘宜外庸之益著往祇成渙嗣有寵光

知遂寧府單夔知建寧府

敕遠臨蜀部念頻年跋履之勞易鎮閩邦示鄉國旋歸之寵具官某受才通敏蒞政精明繇廷尉之年蚤被慈宸之眷擢侍臣之列最居羣彥之先祠庭寢閱于十年帥閩雄開乎三峽旋更會府架著外庸仍次

對之舊班。昇建安之新組。山川伊邇。諒少慰乎羣心。民社匪輕。方有資于善政。惟時舊德。服我茂恩。

張孝伯司農寺主簿

敕具官某。爾以學自奮。吏治有聞。三入朝行。閱歲滋久。凡爾等夷。騰上多矣。退然靖共。物論歸之。茲以序遷。勾稽農扈。尙共乃事。以就器業。

知廣德軍林孝友大理寺丞

敕具官某。列寺皆有丞。惟廷尉之屬。其選爲尤重。必求通儒。以治庶獄。已試之效。吾其捨諸。爾頃居是官。見謂稱職。出守桐川。又以最閒。茲還舊班。進用無壅。惟明克允。以副朕好生之意。

中奉大夫知襄陽府張杓大中大夫知建寧府陳居仁磨勘轉官

敕夙嚴銓法。所以示百僚之公。優待從臣。猶不忘三載之攷。具官某。神機敏悟。器度闊深。禁路升華。久聽星辰之履。帥藩因任。蓋得江漢之心。陳居仁云。性資夷曠。學問淹該。四掖代言。難得深醇之體。南邦共理。尤明寬猛之宜。茲以年勞。應于治典。爰陟文階之等。益增侯服之光。思稱恩榮。尙殫猷告。

中奉大夫吏部侍郎沈揆磨勘轉官

敕制祿以官。式序百僚之進。在法當從。乃登四品之崇。具官某。儒學老成。文華高勝。儲筮有執。經之舊。祠臣推爲誥之工。屢結綬于朝行。幾問津于禁路。攝承民部。更一紀而有餘。積累年勞。雖九遷而未艾。茲擢天官之貳。始伸銓格之優。太中不易公卿。庸表褒遷之渥。大夫旣掌論議。益思獻納之忠。

新除兵部侍郎黃裳顯謨閣待制依舊嘉王府翊善

敕朕惟國朝謹教子之法。王府建翊善之官。在太宗務選正人。惟姚坦最稱直士。自時厥後。何代無賢。我有論思之臣。俾專輔導之任。具官某。以天下士。從吾兒游。自典祕書。已參講席。雖寢歷瑣闥之貴。曾不離朱邸之僚。誦典謨百篇之書。既得坦明之制。正春秋一王之法。尤多深切之言。力辭武部貳卿之除。俾就文謨次對之秩。予以究遺經之終始。予以示朕意之眷留。尙服訓詞。益殫獻告。

成忠郎邕州橫山寨招馬官黃世明轉兩官

敕具官某。戎馬之須。多自南徼。爾招誘盡力。累賞日厚。併陞二秩。以旌其勞。

敕賜進士及第陳亮承事郎簽書建康軍節度判官廳公事

敕具官某。三歲大比。人徒知爲布衣進身之途。藝祖皇帝有言曰。國家設科取士。本欲求賢以共治天下。大哉王言。朕所當取法也。廷策者再。乃始得汝。爾蚤以文藝首賢能之書。旋以論奏勤慈展之聽。親閱大對。嘉其淵源。擢實舉首。殆留以遺朕也。尙循故事。往佐帥幕。益懋遠業。以須登用。

集英殿修撰耿秉權兵部侍郎

敕長才被選。嘗擢侍從之聯。末疾自言。閱勞官職之事。丐閒寢久。簡記不忘。既加晝接之餘。復畀夏官之貳。具官某。稟資端亮。厲操堅剛。篤志愛民。雖細故必加遠慮。推誠致主。無一事不以上聞。屢布藩條。率瞻善最。甫登禁路。俄領外祠。乃俾賜環。再趨文石之陛。亟令持橐。徑歸武部之班。益勵壯猶。以答隆眷。

皇叔祖少保士峴贈少師

敕屬近行尊富貴既無危溢年高德邵死生宜備哀榮具官某迪德忱恂處心夷曠分暉帝籍雖坐致于顯融席慶王門曾不形夫驕吝磊砢維城之望雍容鳴玉之班奉香火于內祠允謂三朝之舊建節施于輔郡更居亞保之尊胡不百年困于一疾驚奏章之上達愴遺老之幾何輟九陛之視朝冠三孤而錫命噫高爵厚祿既已見于生前卹典優恩顧可忘于身後尙惟英爽歆我寵靈

武德大夫鄂州都統制張詔軍政修舉轉一官

敕具官某國家分屯重兵列戍江澚申飭將帥務嚴紀律爾居鄂渚實當上游緩帶輕裘如一儒生而氣稟山西沈鷺善斷軍政修整徹于朕聞何愛一官以示表勸益勵戎昭用圖爾功

直祕閣京西運判朱晞顏直煥章閣知靜江府

敕具官某桂林爲嶺右都會控制最遠帥闔久虛掄擇尤遴惟爾儒雅醇明練達世故蓋嘗爲部使者矣當鹽筴蠱弊之後協心扶持民懷其惠輟京西飛輓之重還撫南方增堯章寓直之名用爲爾寵內安毗俗外戢蠻蠻人心知向條教易孚予自以爲得人爾其有以稱此哉

廣西運判方崧卿京西運判提舉張釜廣西運判

敕具官某等嶺右分百越之半漕計匪輕京西總三司之繁事權尤重爾崧卿儒雅飭吏廉按有稱是用易以襄漢之節爾釜清白傳家斂散惟謹是用圖爾桂林之居道里略同委寄無異飛芻輓粟既資辦治

之才。攬轡登車。益抗澄清之志。爾惟自勉。朕不汝忘。

太常丞李謙浙東提舉

敕具官某。部使者任常平之寄。一道之休戚繫焉。朕固不以輕畀。而況近畿乎。爾篤志于學。力行其言。弦歌之政。見于已試。憂國之心。形乎辭色。輟從朝行。畀以使節。旱澇之餘。歲事未知。周爰咨詢。先事而圖。浙河以東。汝其任是責哉。

知寧國府蔣繼周知太平州

敕。偃藩巨屏。正資共理之良。易鎮鄰邦。允藉上流之重。惟時宿望。聽我訓辭。具官某。經術融明。材猷挺特。歷居言路。凜乎中執法之威。屢剖郡符。翕爾東諸侯之最。念千里相安之久。爲三年報政之期。乃瞻當塗。猶爲重地。民風澹靜。素稱道院于江東。訟牒簡稀。真是太平之官府。更煩舊德。爲撫黎民。矧擊柝之相聞。亟驅車而及境。雙溪疊障。難伸願借之私。五馬一聽。又得宦游之樂。其因詳試。遂訖外庸。

木待問知寧國府

敕具官某。朕念儲闈寮竅之舊。罔匪極一時之選。旣已延登四人。爲予宰輔。其在外里居者。亦未嘗忘也。爾事朕有素。家食累年。起爲二千石。以示舊恩。相攸久之。茲焉始定。宛陵爲江右名郡。以壽皇潛藩。地望尤崇。爾其往爲朕撫字吾民。篤志賑卹。以銷愁恨。歎息之心。豈惟有以副選侯之意。爾亦將由是而進焉。成都提刑楊王休本路運判知閬州續耆成都路提刑

敕具官某等。朕臨御萬方。寄耳目于部使者。地愈遠則任愈重。蜀道萬里。成都奧區。其選又可知矣。爾王休移自瀘川。方祇臬事。易以漕節。就按本道。爾著自守閩風。頗著能稱。俾乘憲車。以表列城。使民之利病。徹于朕聞。而朕之德意。布于遐徼。揚清激濁。威愛兼舉。則爲稱職矣。

知常州陳謙湖北提舉

敕具官某。爲常平而置使。專以惠民。選名士以乘軺。示不忘遠。爾服勤儒術。抗志事功。頃居編摩。已著才望。甫試繁劇。優有治聲。往行重湖之區。典司義廩之政。貿遷鬻海之利。務在通商。綏靖摘山之徒。無致生事。佇觀成績。嗣有寵章。

吏部員外郎雷灝直煥章閣知平江府

敕具官某。姑蘇古郡。號稱吳門。密輔行都。最爲重鎮。地大物阜。訟訴實繁。衣冠走集。應酬不暇。非寬博彊敏之士。其何以居師帥之任乎。爾以辦劇之才。飾以儒雅。嘗以一邑之長。膺千里之寄。又以十連之帥。撫五羊之民。召對便朝。郎潛選部。念未足以究爾之能也。視邦選侯。爲朕一行。加以堯章之職。用爲臨遣之寵。倚開異政。以稱所蒙。

章森依舊知興元府

敕。國家謀帥。豈命令之可移。臣子徇公。亦東西而惟命。問因有爲。未免從宜。具官某。文有古風。神無滯用。以禁路論思之舊。爲藩方師帥之良。建鄴留都。允藉保釐之畧。江陵巨屏。久煩填撫之威。惟此興元。控于



蜀道念開藩之未及。又易鎮以有行。不如舊貫之仍。毋庸新尹之告。漢中地重。肯形雞肋之書。南國教明。當息鼠牙之訟。尙圖茂渥。以答顯庸。

吳總知瀘州

敕。禁路通班。久遂燕閒之適。藩方謀帥。允資撫御之良。方起家而臨民。諒聞命而引道。具官某。胄出勳門。而被服儒雅。世傳戎韜。而深涉藝文。澤笏影纓。舊爲儀于朝列。擁麾持節。屢宣力于坤維。眷此瀘川。控彼南徼。民生繁阜。當勞來安集之餘。軍律申明。嚴坐作進退之節。正賴中和之政。往宣寬大之書。西平王之在唐。固多賢子。諸葛侯之仕漢。自有美聲。益振爾家。用固吾圉。

知太平州葉燾知婺州

敕。聽履而上星辰。緬懷舊德。把麾而去江海。又著外庸。錫以明綸。處之輔郡。具官某。性寬而有制。道廣而能周。爲天子之從臣。最先衆俊。主國家之大計。殆過十年。謀謨備罄于忠嘉。仕已不形夫喜愠。乃曉文昌之老。俾臨寶婺之區。姑熟最聞。未及賜金之寵。括蒼地近。何殊衣繡之榮。倚觀中和樂職之詩。益表平易近民之政。其祇隆眷。嗣有優恩。

劉侯廣東提舉

敕。具官某。朕嗣服之初。首下寬大之詔。俾部使者分察屬郡。務寬民力。爾守岳陽。推誠奉行。凡加賦橫斂之病吾民者。悉加蠲除。幾去歲額之半。薦章交上。朕甚嘉之。嶺海去朝廷遠。畀爾一節。專斂散之權。推岳

陽之意而行之。遐陬其息肩乎。

# 攻媿集卷三十七

## 外制

同知樞密院事趙汝愚知樞密院事

敕。朕延登樞臣。方務親賢之並用。擢專兵本。豈以日月而爲功。式隆磐石之宗。益聳維巖之望。具官某。仙源有自。天分素高。發之以場屋之聲名。博之以師友之問學。論思禁路。真有諍臣之風。填撫藩方。著古循吏之績。望之堂堂。折而不撓。元齡孜孜。知無不爲。卓爾士夫之間。居然公輔之器。頃爲儲案。已知許國之忠。茲貳機廷。尤見愛君之篤。俾陞右府之長。密贊中宸之謀。增衍眞腴。併昭異數。噫。三軍五兵之間。雖未至于廟堂。一日萬幾之繁。正有資于帷幄。朕方越拘犖而圖任。爾其勉忠力以赴功。惟旣厥心。同底于治。

吏部尙書余端禮同知樞密院事

敕。朝建幾廷。實總事樞之要。任專軍政。尤資副貳之賢。乃圖舊人。用稱隆委。具官某。氣和而有守。資介而能通。蚤膺慈辰之知。徧儀清貫。爰列儲闈之屬。久事初潛。裨身有肅括之稱。立朝奏正直之德。典銓衡于選部。尤推鑒裁之公。守管籥于留都。允藉保釐之略。召還位著。益簡予衷。蓋君臣相知。非一日之積。而文武並用。何二柄之分。屢登朝夕。論思之班。宜居夙夜。宥密之地。啓侯封之土宇。界采邑之圭腴。噫。運籌帷

幄之中。當遠追乎前躅。折衝樽俎之上。正有望于壯猶。尙服寵光。毋替朕命。

萬鍾司農卿

敕具官某。爾以才諳。早爲九卿。去國久之。擢冠宰掾。仕已之際。不見幾微。召對便朝。奏論詳雅。是用命汝。復長予周稷之任。王城內外。儲粟動以百萬計。上下仰給。事則浩繁。往哉惟欽。以稱朕意。

通議大夫知樞密院事胡晉臣致仕

敕三年輔政。是爲股肱之良。一乞身。欲挂衣冠而去。勉從爾請。深軫予衷。具官某。迪德粹和。秉心正直。尊賢容衆。無一毫忌刻之私。學道愛人。備四時溫厚之氣。察其有守。任以不疑。典封駁于東臺。贊樞機于西府。進參巖嘏。遂長本兵。方期竭節以相養。乃以沈疴而有請。任重道遠。知許國之未量。名遂功成。奚退身之太早。無君子者。如蒼生何。噫。垂車而傳子孫。顧莫回于雅志。就第而問籌策。尙有冀于壯猶。其服寵光。以綏吉履。

胡晉臣贈金紫光祿大夫資政殿大學士

敕抗章自列。俯從納祿之言。遺奏上聞。猶篤愛君之義。驚柄臣之已矣。撫往事以愴然。具官某。天賦純誠。世推厚德。仁必有勇。立朝多審諤之忠。正而不它。致主盡忠清之節。自登近弼。可謂大臣。何抱疾之遽深。願辭榮而勇退。始猶未許。遂不可爲。愛之欲其生。謂何恙之不已。死者如可作。微斯人而誰歸。加祕殿之隆名。極文階之三品。俾昌厥後。均賜以官。噫。命方士而求馬周。空軫如存之念。輟餘瓜而莫如晦。徒增追

悼之懷。顧一鑑之既亡。嗟九京之何及。尙惟英爽。歆此寵靈。

潼川運判劉光祖奏儒林郎知資州龍水縣楊安益賑濟有方循一資

敕具官某。潼川去朝廷遠。頃修荒政。部使者察一道官吏之能否。以龍水爲最。而聞于朝。進爾選階。以示褒表。

徐元德知均州

敕具官某。均之爲州雖遠。以其控制洞蠻。置武當之節使。填撫一境。任不輕矣。爾蚤以經學。教授鄉里。旋以聲望。登進朝行。貳郡新安。績用樂著。剖符蓋土。以惠遠民。往哉惟欽。益行所學。

太常博士陳棟祕書丞著作佐郎李唐卿著作郎祕書郎范仲黼著作佐郎校書郎王爽祕書郎正字蔡幼學校書郎

敕具官某等。道山羣玉之府。聚天下英俊其間。所以涵養器業。以爲進用之儲也。爾棟以容臺議禮之舊。爾唐卿。爾仲黼。登瀛既久。爾爽。爾幼學。給札著聞。或分典丞郎之職。或序進著作之庭。校讎未見之書。不改共二之故。職優選遴。孰邁于此。其思稱崇獎之意。以爲邦家之光。

太學博士邵康太常博士曾祕國子博士太學錄雷孝友國子正田澹並太學博士

敕具官某等。博士秦官。掌通古今。員多至數十人。國朝稽古建官。凡以博士名者。皆清選也。爾康。學問該洽。俾議禮于奉常。爾祕。資稟純篤。俾典教于胄學。爾孝友。爾澹。俱以上庠糾正之職。陞教育之任。一日而

拔士以十數。亦足以知朕好賢之意也。其祇明命。毋曰序遷。

費士寅藉田令

敕具官某。朕立賢無方。視所爲主。苟得茂才。多列于朝。爾以西州之雋。褒然爲舉首。薦口旣重。又當有以表異之。往司帝藉。實預容臺。清華之選。權輿于此。惟務靖共。以俟甄拔。

主管吏部架閣陳希點國子正湯璿國子錄

敕具官某。士修于家而仕于朝。又典膠庠之教事。可謂榮矣。爾希點。蚤上甲科。久爲掌故。爾璿。首冠南宮。未登華途。嘉其靜退之風。俾參樂育之選。雅有聲望。司予成規。子率以身。疇敢弗恪。

湖南提舉郭德麟宗正少卿

敕具官某。宗正一星。在帝座之東。朝廷以屬籍爲重。設官以象之。卿少之選。亞于太常。非他寺比也。爾以諒直周密。久司六察之職。出持使節。深簡予衷。賜環來歸。優真少列。豈徒爲養望之地。將有以進汝焉。

皇叔祖贈少師士峴追封郡王

敕冠三孤之位。旣頒卹典之優。疏千里之封。更極眞王之貴。具官某。分暉天派。擢秀宗支。琚瑀珩璜。允矣朝儀之肅。囊兜戟纛。居然將闔之崇。雖平生坐致美官。而終老不愆素履。逮朕纂承之始。方形親睦之風。曾頒爵之未遑。乃抱疴而自晦。云何不淑。遂止于斯。噫。播笏垂紳。愴典刑之安在。分茅胙土。尙冥漠之有知。用慰爾靈。益昌厥後。

士峴女三人並封縣主

敕某人。朕不承慶基。崇篤宗老。凡今屬近行尊。歷事三朝。如爾父者。幾人。奄其告終。遺奏來上。粲然三女。願賜湯沐。朕何愛大邑之封。不以慰爾父之意乎。益懋壺彝。以對隆渥。

同知樞密院事余端禮初除封贈

曾祖慶太子少保

敕。士有致位廟堂。而光顯于時。其上世終身韋布。而追榮于後。惟源流必有所自。而貴盛亦豈偶然。具官某。樂道丘園。隱居閭里。人無知者。實有侔于天。我自得之。故無待于外。比及三世。乃生貳樞。朕方以儲闈舊學之臣。擢居宥府。基命之地。首以宮保之亞。用爲曾門之光。豈徒顯爾宗之祚。抑以爲善士之勸。

曾祖母徐氏齊安郡夫人

敕。朕延登儲寮。進貳樞筦。旣已寵及上世。又念伉儷之賢。必有以相之者。故加以小君之號焉。具封某。生太末之區。盛偃王之族。嬪于良士。託以終身。諒闡範之可稱。至曾孫而遂顯。擇黃岡之佳郡。開石窕之新封。賁爾泉局。歆予渙渥。

祖鐸太子少傅

敕。君子之澤。旣被于後人。朝廷之恩。宜及于先世。有德必大。可攷不誣。具官某。探六藝之遺言。爲一鄉之善士。雖文學行誼。不見于用。而孝悌忠信。能行于家。再傳而興。致身樞近。推跡先祖之自。欲亢余氏之宗。

青宮六傅舉以命汝。尙惟不泯。服茲寵靈。

祖母傅氏高平郡夫人

敕。儒者篤行。不顯于世。而能垂裕子孫。則亦惟閨門能循法度。以爲之助。追贈之寵。攷宜共之。具封某。謹蘋蘩之儀。佩圖史之訓。克事君子。相敬如賓。是生賢孫。爲朕良佐。以高都之名郡。爲湯沐之新邑。惟爾靈其預享之。

父贈通議大夫繪太子少師

敕。信安自趙抃以來。仕登宰輔。不過三數人。我有本兵之賢。固由自致。跡夫義方之教。當揆所元。具官某。秉心靜淵。履行澹固。分薛包之田。而愛形于兄弟。折馮驩之券。而義篤于鄉閭。積善有餘。固非一日之力。延師不倦。遂成令子之名。周旋清班。登進宥府。蜜章加贈。屢升法從之階。禰廟益親。獨筮宮師之選。以示教忠之效。以寬追遠之思。

母淑人虞氏咸寧郡夫人

敕。士之家傳。固出父師之訓。古有胎教。實由母氏之賢。仕旣顯于朝廷。寵宜加于泉壤。具封某。天資婉孌。婦德靜專。謹以事夫。速追舉案之美。勤于教子。不媿斷機之言。雖魚軒不見于生前。而鸞誥屢頒乎身後。茲錫義川之號。蓋由樞筦之恩。慶則有餘。澤其未艾。

妻淑人葉氏信安郡夫人



敕大臣許國能有羔羊正直之風。夫人起家必如鴈鳩均一之德。既資內助之力。宜啓小君之稱。具封某。姆訓是遵。壺彝甚飭。相爾夫子。不以事物嬰其心。爲時名卿。得以廉白厲其操。位登兩地之貴。恩霑三世之先。矧惟魚軒。宜爾象服。視樞臣而命爵。就鄉郡以疏封。益肥汝家。庸稱予渥。

浙東提舉李謙乞將合轉朝奉郎一官回授

本生父翊贈承事郎

敕具官某故本生父某。朕方以孝治天下。凡以親爲請者。多曲從之。爾世有令德。躬履特操。是生賢子。而嗣其兄。旣已能顯其父母矣。願捨外郎之一秩。求贈本生之二親。澹化澹熙。況有故事。是用寵爾。以廷評之階。詩不云乎。孝子不匱。永錫爾類。爾子方爲部刺史。以此風厲郡邑。其助吾風化多矣。

本生前母王氏本生母陳氏並贈孺人

敕具官某故本生母某氏。爾有賢子。出繼伯父。旣顯其親。又適惟本生之重。願加贈典。有司已援舊比。且言員郎所係爲重。而其請于義可矜。足以勸臣子榮親之孝。朕曰俞哉。並進湯沐之封。以爲泉壤之寵。

胡澄知光州趙彥珖知容州

敕具官某等。光山之在淮右。今爲保障之區。容管之在廣西。舊爲經略之所。選侯而往。寄任匪輕。以爾澄起由名家。嘗奏郡課。爾彥珖秀出天族。游佐藩條。往分顧憂。當體朕意。有政可紀。無遠不聞。勉哉。

四川總領楊經直寶文閣提舉四川茶馬

敕具官某。爾以宰掾之長。往餉蜀門之師。萬里馳驅之勞。計當入境。四川權牧之寄。尤在得人。與其遴選于中朝。孰若就煩于便道。載頒英蕩。寓直寶奎。摘山以惠遠人。市駿以備戎事。惟鄉閭之在望。宜利病之詳聞。往旣乃心。用揚厥職。

淮西提舉張同之奏修職郎安豐軍六安縣令陸子虞救活被水人一千四百餘人。循一資。

敕具官某。鼓鐘伐鼙。淮有三洲。詩人所以興嘆也。安豐之潦。朕聞而念之。部使者謂爾有字民之能。仍得救災之術。進爾一階。又以少徇父老借留之意。其亦寵矣。益勉之哉。

朝奉大夫知絅州計孝似夷賊作過不能彈壓降一官

敕具官某。燹道被邊。郡將實當控御之寄。而威令不申。夷獠侵侮。驚擾邊氓。害及徼吏。久而後定。是不于汝而誰責哉。其上一秩。尙思後圖。

朝散郎絅州通判李棟孫節制義軍驚動夷賊降一官放罷

敕具官某。遠夷匪茹。侵我王略。爾爲別駕。受帥檄而不進。擁義軍以自尊。致此猖獗。而又貪功倖賞。迹狀昭然。削秩免官。以示邊吏之戒。尙爲寬典。其務省循。

諸王宮教授楊大灋國子監丞黃度並監察御史

敕具官某等。憲臺設屬。實分六察之司。御史虛員。當極一時之選。孰堪此任。今得其人。以爾大灋以端恪之資。而達于時宜。爾度以深沈之量。而敏于吏事。舊臨劇縣。俱著能聲。嘗對便朝。各陳讜論。尙忠而用夏。

政既已先明詔之頒。約史而作宋經。亦已攷遺編之載。並加羈擢。蓋自簡知爾其助正紀綱。振揚風采。務求稱職之實。毋負官人之能。

福建提刑盧彥德本路運判

敕具官某。爾屢持使節。爲時老成。暫居郎曹。復按閩部。祥刑之寄。方藉平反。將漕之司。又煩調度。不改山川之舊。仍頒郡邑之條。益靖吾民。以稱朕指。

知郴州吳鑑湖南提舉

敕具官某。爾以冊府之英。起當郡寄。慈惠之政。徹于朕聞。夫士之務學。固將見之用也。始以宜章之最。俾任一州。茲由郴陽之能。得廉一道。矧是湖湘之遠。方當早潦之餘。釅茗阜通。雖攸司之甚重。倉庾斂散。尤荒政之宜先。爾能究心部刺史之職。則朕之用汝等而上之。庸止此耶。

曾集知嚴州

敕具官某。贛川之會。人物相望。仕至二千石者。前後以十數。聲績茂焉。爾習于家傳。有志乎古。試以郡寄。有志乎民。還奏便朝。嘉其詳練。惟嚴陵之輔郡。實高廟之潛藩。分以左符。用撫吾民。由小州得大州。蓋亦寵矣。益勉厥職。以大爾家。

沈維知房州

敕具官某。爾以相家子。明習文法。自致應仕。蓋嘗久于廷評。爲丞爲正。又出爲二千石矣。中更閒退。閱歲

滋深。起爾于家。俾分房陵之符。戢吏愛民。省刑節用。治郡之大端也。爾皆知之。奚俟多訓。

知江州王師古廣東提刑知吉州胡長卿廣西提刑

敕具官某等。國家分道遣使。以祥刑爲重。嶺海之遠。尤遴于擇人。爾師古奏潯陽之課。爾長卿報廬陵之政。俱以儒雅飾吏。踐馭歲久。授之軺傳。其必能爲朕審用刑章。平反庶獄。使百城之民。自以爲不冤。亦惟休哉。

吏部員外郎錢象祖陞郎中

敕具官某。爾自淳熙初元。攝事列曹。今二十年矣。三易州麾。一擁使節。凡今郎吏。出入省戶。未有如爾之久者也。茲以積攷。始正其名。資望俱高。益稱詳練。雖曰銓法。尙服優恩。

新成都府司戶李僑乞將所得官資回授父証贈迪功郎母廖氏贈孺人

敕具官某。士之發策決科。以求仕也。爾之子萬里造庭。得官名都。而求致其事。以榮二親。此非追遠報本。不可解于心者能之乎。朕甚嘉之。曲從其請。予以風厲四方。使知慕焉。

新徽猷閣學士知建康府張杓依舊知襄陽府

敕金陵爲帝王之宅。方藉保釐。羊祜得江漢之心。爰加因任。具官某忠嘉傳世。才智絕人。兼言語政事之科。何施不可。更彈壓惠養之政。易地皆然。惟今襄陽。在昔畿甸。暢皇靈于遐徼。控天塹于上游。謀帥留都。已昇玉麟之重。還車舊鎮。諒多竹馬之迎。惟首公而忘私。遂聞命而引道。吏民如故。不煩條教之載頌。城

韓重來但覺精明之頓改其祗茂渥以訖外庸

左司應孟明中書門下省檢正右司徐誼左司員外郎

敕具官某等宰掾之任重矣。自爾二人爲之。實能謹守程度。參稽事宜。佐吾二三大臣。以平章中書之務。大臣亦言其能。朕用嘉之。以序而遷。滋嚮于用。益習天下之事。以昌遠業。尙勉之哉。

何澹煥章閣學士知泉州

敕弄大夫之印。方渴想夫嘉猷。分刺史之符。尙往臨于重鎮。睿知有素。中外惟均。具官某名擅倫魁。望高風憲。由辟水師儒之任。歷騎省諍臣之班。披腹而呈琅玕。獨任臺綱之長。把麾而去江海。更觀吏治之優。矧是泉山。實雄閩嶠。徒得君重。勉爲朕行。煥乎文章。示西清學士之寵。凜然風采。增南國諸侯之嚴。倚聞報政之期。其體顧憂之意。

樞密院編修官呂棐太常丞

敕具官某。三丞號高選。而容臺爲最。不惟禮樂是司。凡朝廷有大議。必咨焉。是可以輕畀哉。以爾奮自儒科。又精吏事。持論不苟。廉直自將。久于編摩。擢實華列。惟寅惟清。往贊而長。

國子監主簿王源國子監丞

敕具官某。胄監以教養人才。而金穀細務。丞實司之。爾父頃在從班。有批勅之風。能繼世科。風烈未遠。久服勾稽之職。就俸序遷。資望寔高。尙思所以稱其家者。

監登聞鼓院李友直宗正寺主簿監都進奏院羅克開國子監主簿

敕具官某等。國家銓擇人才。進各有敘。勾稽之職。在寺則司宗爲清。在監則胥庠爲重。以爾友直。儒學老成。舊傳夫素業。爾克開士行修飭。自奮于世科。進官于朝。雅有賢譽。俱遷簿領。實階華途。架務靖共。以祇朕命。

潘景珪知湖州

敕具官某。吳興名邦。今爲輔郡。地大而民阜。賦重而訟繁。視邦選侯。弗以輕畀。爾練達吏事。明習憲章。入從出藩。踐敷舊矣。起家爲二千石。顧豈擇地而後安。移前日彈壓之威。而爲惠養之政。尙優爲之。以稱朕意。

沈瀛知江州

敕具官某。大江之險。分戍重兵。潯水之陽。號稱要地。軍民錯處。牧御須才。爾奮迹膠庠。馳聲場屋。仕雖三已。而無愷。予豈一端而取人。旣輟新安之行。復分共理之寄。綏靖十同之衆。撫安萬竈之屯。此而有稱。進則未艾。

承節郎絳州管界巡檢程仲乾。因夷人作過。被殺。特贈兩官。與一子進武校尉。

敕具官某。爾爲徽吏。勇于捍寇。而捐其軀。謀雖不足。過于逗撓。自全者遠矣。以二秩告第。而官其子。庸勸邊臣之用命者。

湖南提刑孫逢吉祕書少監

敕具官某。道山羣玉之府。聚天下英才其間。必又求才之傑然者。領袖之遴選之久。今得其人。以爾稟資端方。充之以學。九流百氏之書。該綜無遺。良史之才。諍臣之風。爾實兼之。頃由少司成出使湖湘。刺舉惟公。風采凜然。是今日第一流人物也。還爲少蓬。孰不曰宜來游來歌。以副虛佇。

楚州奏忠訓郎添差副將魏昌教習效用弩手轉一官

敕具官某。爾以名將之子。習于戎昭。練兵山陽。守將以告。授之一秩。以勵能者。

蔣蘭邵公翰奚士遜邵袞並大理評事

敕具官某等。理官之屬。惟廷評爲甚勞。獄成之告。必躬必親。非習于文法者。不在茲選。今又試以經術。蓋欲兼用儒者也。爾等俱以場屋之舊。明司空城旦之書。而中其科。虛位旣久。並舉而用。各揚乃職。使人知引經決獄之效焉。

太常少卿薛叔似祕書監

敕具官某。朕以册府爲重。選才甚嚴。信宿之間。旣得逢吉爲之貳。又俾叔似長之。所謂朝取一人焉。拔其尤。暮取一人焉。拔其尤。士論翕然。朕亦自樂于得賢也。爾問學淵博。論議明辯。結知慈皇。擢在諫省。有古諍臣之風。遠乘軺車。歸貳容臺。物望無不宗之。旣授以太史氏之職。復使正此久虛之位。表儀雋游。儒者之至榮也。雍容養望。以俟甄擢。

司農少卿詹體仁太常少卿

敕具官某。奉常惟禮樂是司。而去古寢遠。放失尙多。非得博物洽聞。學有根據者。未易輕畀也。爾少明經術。務爲有用。探賾索隱。恥一物之不知。總餉之久。蓋已由郎省而貳大農矣。召對雍容。效忠無隱。其爲朕典禮樂之事。鐘鼓玉帛。抑末也。尙求其本而釐正之。

蔡戡司農少卿

敕具官某。爾起由名家。以甲科自奮。登用最蚤。敷歷已多。深沈之度。廉退之節。朕知之舊矣。比總軍儲。嘗貳外府。升之農扈。備予九卿。朕欲收拾人才。共興治功。覽爾奏篇。又有得士之喜。顧豈獨望以周稷之事。然積貯天下之大命也。方平糴以爲備。尙贊而長。使事集而民不擾。則予汝嘉。

新知泉州何澹兩易知明州

敕起鎮泉山。將趨于閩部。易麾鄞水。併護于瀛壖。凜聞憲府之名。增光制閩之寄。具官某受材精敏。履行粹和。場屋文鳴。蚤先衆俊。朝廷德選。寢歷華途。屬予纂紹之初。賴爾論思之益。擢居騎省。端有古諍臣之風。進長烏臺。真得中執法之體。遽收朝蹟。再更歲華。洊昇郡符。俾近畿甸。地當一面。海市三垂。蔽遮浙河之東。控御島夷之外。布宣德意。豈惟欲田里愁恨之銷。敷暢王靈。正欲藉文武威風之重。倚聞成績。嗣有殊褒。

知明州朱佺兩易知泉州



敕具官某。才有小大之異。而選用當適其宜。郡有遠近之殊。而委寄之重則一。爾詳練世故。敷歷仕途。鄧嶺分麾。報政久矣。溫陵改鎮。易地皆然。此則控東夷之要衝。彼則據南海之都會。內修侯度。外暢王靈。諒無憚于脩途。當復聞于善最。

司農少卿胡球湖北運判

敕具官某。朕臨御萬方。寄耳目于部使者。又間遣諫官御史爲之。俾遐陬之氓。如在畿甸。矧湖右實據上游。而外臺當軍民錯處之地。任顧不重哉。爾外靜而內明。言簡而氣勁。一見而決。亟寘諫垣。雍容論奏。多所裨益。乃自引嫌。遷貳大農。丐外再三。察其勇退。茲用授爾以飛輓之寄。爲官擇人。非以遂爾之私。因事進規。無忘愛君之意。

高文虎將作監丞

敕具官某。朕旁招俊乂。布列周行。德進言揚。如恐不及。矧以太史氏之舊。引疾家居。十有四年。昔病今愈。予環可後乎。爾博學篤志。承伯父之傳。網羅舊聞。述史遷之緒。採之公論。僉曰汝賢。再轉爲丞。尙居繕監。職務清簡。可以卒汗青之業。毋以匠爲嫌也。

汪粹軍器監丞

敕具官某。爾舊弼之子。以才自見。出臨邊郡。綏靖有方。奉最言歸。論奏明辯。丞于戎監。孰不謂宜。矧爾久在塞垣。有志事功。除戎器以戒不虞。國之務也。亦惟欽哉。

戶部侍郎趙彥逾工部尙書

敕。攷六典之書。實重冬官之職。總百工之事。今惟起部之司。乃得宗英。俾居常伯。具官某。聯休天派。擢秀儒科。立志孤高。萬鍾何加于我。持身廉潔。一介不取諸人。令名遠紹于間平。惠政徧加于楚蜀。任國大計。爲予良臣。朝夕論思。有猷必告。簿書期會。惟正之供。勤勞已著于累年。寵數遂登于八座。親賢並用。朕方隆睦族之風。投巧咸精。爾尙致若工之命。

# 攻媿集卷三十八

## 外制

太府少卿兼知臨安府袁說友權戶部侍郎

敕。朕攬收人才。思裕邦用。足兵雖急。要先足食之言。大計是謀。嘗求大度之士。是爲儒者之效。孰曰民曹之難。具官某。文有英詞。神無滯用。蚤登館學。嘗接武于華途。旋歷麾符。屢策勳于劇部。居輦轂彈壓之任。知里閭銖兩之姦。前張後王。聲望相繼。東賈西萬。豪猾自消。疊膺晝接之榮。擢真地官之貳。損上益下。朕欲圖加賦之寬。理財正辭。爾尙明盍徹之意。

直祕閣兩浙運判王厚之直顯謨閣知臨安府

敕具官某。國家駐蹕吳會。視古天府。民日庶事。日繁。師師之寄。尤難其人。以爾先世嘗爲京尹。治行超卓。如漢章尊。汝實是似。故以命汝。自其少時。博雅篤學。世味冲澹。若將終身焉。一行作吏。所至辦治。處之以榮觀而超然。投之以劇繁而不亂。是宜居此官者。輟自漕臺。加畀延閣。用爲爾寵。唐人有言。輦轂之下。先彈壓郡邑之治。本惠養。此言殆未純也。五方之民。固爲厯雜。九縣之衆。尤須撫字。威惠交孚。則爲稱職。且稱其家矣。

戶部員外郎黃輔直祕閣兩浙運判

敕具官某。部使者之職重矣。而畿漕視他路尤劇。近歲率用儒者。不惟職務整辦。惠愛遂及于浙河之東西。是不可改也。以爾起由膠庠。凝粹而開敏。嘗使江東。得斂散之宜。澄按列城。不苛不弛。茲由郎省。付以漕事。寓直延閣。以示寵嘉。矧在鄉邦。周知利病。爾能罷行之。下有月旦之評。上有公朝之論。當不日而徹聞矣。勉哉。

李大卞知洋州

敕具官某。洋川在東蜀爲望郡。通儻谷駱谷之道。據黃金戍之險。賢牧風流相傳。左符不以輕畀也。以爾家世循良。明習吏事。雖安于閒退。而閱歲已多。勉爲一行。以副朕選用之意。

虛恨蠻酋首成忠郎袁弄滿三年轉一官

敕具官某。國家銓法。文臣以四年。武臣以五年。乃得進秩。三載攷績。不以施諸庶僚也。以爾慕義中華。誓保西南塞下。郡將有請。升爾一階。益貞乃心。毋替于舊。

監建康府權貨務武翼郎趙公遜修武郎丁昌時收趁增羨各轉一官

敕具官某等。摘山鬻海之利。權之以佐軍需。其數實繁。爾仕陪都。歲課登衍。何愛一秩。以勸後來。

周珙大理寺丞

敕具官某。李官之屬。率以文法進。求其持身無玷缺。以儒術飾吏事者。尤難其人。爾起名家。久于棘寺。嘗

爲丞爲正矣。試郡有稱。奉最來歸。(案)奉一本作奏。與前卷奉最言論奏明辯互證。當作奉。再轉爲丞。復典臬事。雖若小迂。而榮途自此無壅矣。

隨龍御前忠佐馬步軍都軍頭陸安轉遙郡刺史

敕具官某。爾事朕濟藩。首尾三十載。勤且久矣。然稍逾三尺。則有司執法以裁正。既進六資。則朕之寵命復行。上下俱爲得體。而爾受之亦宜。往刺一州。益務忠恪。

浙西提刑葉適吏部員外郎

敕具官某。郎選在今。爲甚重。雖朝列名流。必著外庸。而後授。今得人物之英爲之。則又增重矣。爾博極羣書。洞視千古。文章之發。追配作者。頃由冊府。試以郡寄。臨事知變。就畀使節。以寵之。天官名曹。實爲星省之冠。是不于爾而誰屬。簡要清通。爾其兼之。

判潭州周必大判隆興府

敕。詔起東山。已報長沙之政。符分南服。尙提新府之封。乃睠元台。載覽明訓。具官某。閱深而肅括。堅正而裕和。極論思獻納之工。盡輔贊彌縫之用。始終一節。光顯三朝。進退百官。聚英才而在列。總領衆職。任大事以不疑。方安藥館之閒。往鎮藩方之遠。眷懷不替。委寄則均。政化流行。有類上公之分陝。威名孚洽。共期大老之歸周。惟此南昌。尤爲要地。爰命三孤之重。式遣十乘之行。矧爾寓居之鄉。實今賜履之下。既喜袞衣之寢近。抑知畫錦之有光。先聲所臨。羣聽自聳。噫。令行庭戶。當還帶牛佩犢之風。福及京師。更伫自

葉流根之效。來綏四國。式憲萬邦。

朱熹知潭州

敕具官某。十國爲連。師帥是寄。矧長沙控湖湘上游。賜履甚廣。視邦選侯。尤難其人。以爾古學粹深。風節峻特。可以爲世之師。仁心仁聞。威惠孚洽。可以爲時之帥。兼是二者。往臨藩方。聲望所加。列城登服。儒先相望。士氣方振。爾其爲朕教之。楚俗雖安。尙有凋瘵。爾其爲朕撫之。典刑所存。奚俟多訓。

陳公亮江西運副

敕具官某。朕惟郡邑官吏至繁。不勝其選。故精擇部使者。付以揚清激濁之寄。以爾抗直而詳練。由宰掾持七閩使者節。按刑畿甸。又有能聲。是豈可一日使之家食而不在事。易節待次。姑以徇爾之私。大江之西。將輸事重。益謹厥職。以副眷懷。

吏部郎中林湜太府少卿

敕具官某。版曹總國用之要。而帑藏分之有司。必以外府處其中。所以檢柅財貨之出入。不嫌于詳。其可以輕畀哉。爾奮身儒生。習于吏治。在縣爲賢大夫。入朝爲才御史。澄按兩道。攝承十連。皆有聲績。徹于朕聞。召真郎闈。靖共爾位。進之少列。以慰公言。率屬究心。使上下兼足。爾其懋哉。

戶部郎中趙謚軍器監

敕具官某。戎監之設。本以嚴飭武備。而休兵歲久。繕修之職。各有司存。長貳亦惟總其凡而已。以爾舊弼。

之孫克自抑畏。久在郎省。能寡悔尤。序進爲長。仍攝民曹。往其祗欽。毋替于舊。

龍圖閣學士正議大夫韓彥直磨勘轉官

敕。夙嚴銓法。所以示百僚之公。優待從臣。猶不忘三載之攷。具官某材猷通敏。政術闡明。歷事三朝。負縉紳之素望。投閒十載。號簪橐之舊人。心安藥館之居。職寓河圖之峻。年勞旣久。官簿愈高。用爲晚節之華。其服寵光之渥。

寶文閣學士大中大夫顏師魯轉一官致仕

敕。奉香火于真祠。方徇投閒之請。掛衣冠于神武。遽騰告老之章。雖欲挽留。不如得謝。具官某性資剛毅。政術疏通。幼學壯行。曾不渝于一致。出藩入從。蓋詳試者累年。往使殊鄰。抗節不撓。進登常伯。典銓尤明。一辭宸陛之嚴。游鎮泉山之遠。力求閒退。方念儀刑。不知何恙之深。載覽引年之奏。俾升官簿。以寵老臣。眷簡未忘。姑遂明農之志。始終無玷。尙餘許國之忠。服此恩光。體予至意。

顏師魯贈四官

敕。垂車得請。尙想履聲之餘。易簣有言。猶存尸諫之意。愴老成之已矣。念冥漠以憮然。具官某受才高明。植操堅特。莅官行法。所至有循吏之風。憂國愛君。直欲任天下之重。獨辭榮于八座。乃斂惠于一方。身退而名益彰。年高而德彌邵。眷舊臣之無幾。驚遺奏之遽聞。超進文階。仍延世賞。仰無愧俯。無怍。何謝古人。生也榮。死也哀。終全晚節。眷惟英爽。歆此寵靈。

正議大夫尤袤轉一官守禮部尚書致仕

敕位列儀曹。屢上求閒之請。恩隆儲案。俯從納祿之私。茲焉告歸。于以示寵。具官某器資精敏。學業淹該。隱帙奧篇。了辨無爽。殘膏賸馥。寔巧爲多。冊府道山。極一時儒學之選。詞垣翰苑。兼兩朝制誥之工。比訖外庸。進儀清禁。命之夕拜。有唐人批敕之風。擢以春官。當虞臣典禮之任。乃因感疾。遽欲辭榮。俾陟崇階。以華晚節。李綱乞骸而去。肯久于尚書。孔戣得謝而歸。仍加于禮部。尚祗渙渥。無媿前良。

尤袤贈四官

敕舊老遺榮。猶有留行之意。表章載覽。忽形垂絕之言。天不慙遺。人所嗟惜。具官某以時耆德。事朕初潛。蚤歲宦游。殆及王、楊之接。晚年貴重。遂從園綺之招。古事今事。問無不知。大言小言。進必有補。爰暨纂承之日。首參侍從之班。召自藩方。喜典刑之如故。擢居瑣闥。嘉悻直之不衰。圖任方深。求歸何亟。雖弗至甘盤之罔顯。恨不許彥博之少閒。爽此良臣。勳予深念。進四階而命秩。按三尺以疏恩。學焉而後臣之。正賴多聞之益。死者如可作也。抑惟斯人之歸。或其有知。毋悼不幸。

起居舍人陳傅良起居郎

敕具官某言動之屬。史官固有左右之異。朝廷之用。賢士豈以日月爲功。試之加詳。旨則有在。爾窮百氏之學。發六經之文。身方在于布衣。名已傳于海內。外庸旣訖。衆望愈歸。比再入于脩門。寢擢居于清貫。叩其著述之業。登之記注之司。螭陛直前。善開明于朕意。鳳池共二。能震耀于王言。執義不回。秉心無競。稍



遷厥職。以重此官。庶幾朝宁之間。猶見儀刑之舊。載纂高皇之典。仍陪元子之遊。益啓乃心。毋忘忠告。

祕書郎彭龜年起居舍人

敕具官某。朕修明官制。用之有條。識拔人材。待以不次。惟此柱下史。在邇列以尤親。取之中祕書。迨近時之罕有。既云遴選。安得異辭。爾操守堅剛。論議剴切。端公辟屬。贊臺院之宏綱。冊府爲郎。號士林之翹楚。擢寘螭頭之直。俾陪豹尾之班。不循年限而授此官。深得用魏墓之意。掌錄時政以付國史。尙克遵唐室之規。益效忠猷。以酬異渥。

朝請大夫權刑部尙書京鏗磨勘轉官

敕。六卿分職。皆吾從囊之臣。三載陟明。優爾吏銓之制。具官某。謀謨宏達。識度恢洪。頃膺慈展之知。徑上甘泉之列。張旛而使萬里。折戎虜以不驕。叱馭而鎮兩川。撫民夷而咸服。召登宸陛。擢寘秋官。茲以年勞。應于治典。爰峻文階之等。益增禁路之光。尙服恩榮。式殫猷告。

兵部尙書羅點落權字

敕。尙書古之納言。必求德望之妙。武部周之司馬。實惟邦正之專。肆疇已試之良。爰錫爲眞之寵。具官某。訐謨經遠。雅量鎮浮。蚤歷近臣。自有老成之譽。素多仁聞。仍全剛毅之資。推愛人利物之心。爲致君澤民之業。詞掖久推于潤色。經幃尤賴于講明。旅登聽履之聯。兼莅典銓之重。儀刑朝著。滿歲已深。領袖從班。優賢可後。有常德以立武事。正需舊學之規。以軍令而振國容。方倚壯猶之助。往祗成命。式贊永圖。

兵部侍郎耿秉落權字

敕。朕旁招賢士。遴選從臣。惟我舊人。載處五兵之貳。不煩滿歲。遂頒一札之書。俾正厥名。敷告于衆。具官某性資剛果。器識宏深。夙志功名。善談當世之務。屢更事任。專以斯民爲憂。故典州則千里舉安。而將命則列城蒙惠。徧儀華貫。寢簡予衷。掄才甫上于禁途。引疾遽收于朝蹟。勿藥有喜。盍歸乎來。留賓邇聯。方藉論思之益。願全晚節。尤高廉退之風。乃加異除。俾鎮雅俗。囊弓雖久。豈忘武備之修。持橐甚休。益謹忠猷之告。尙承至意。毋有遐心。

工部侍郎謝深甫落權字

敕。朕昭德塞違。臨政願治。乃瞻吉士。游兼夕拜之官。樂聞嘉言。俾正冬官之貳。固云試可。實示褒升。具官某性稟粹純。行能膚敏。被聖父非常之遇。膺周行不次之除。嗣服云初。首居郎省。量才旣審。擢實諫垣。顯顯朝望之益高。齊臺奏篇之切當。晉登左陛。咸推記注之功。就尹中都。更資彈壓之重。持橐優遷于起部。典銓仍領于選曹。載輸批勅之忠。尤見愛君之篤。豈應久次。宜遂爲真。疇若予工。匪求精于技巧。毋替朕命。尙益效于論思。

汪德翰知崇慶府

敕具官某。始吾高宗開公社之封。實自蜀國。尋以崇慶名軍。蓋久而後冠以府號。地望滋重矣。選侯可輕乎。惟爾祖首貳元帥府。以佐中興。爾爲恂恂。克守家法。簡池之政。平易無華。畀以左符。往守茲蜀。念之哉。

無忝爾祖。則不負寄委此邦之意。

宮人符燕。轉永寧郡夫人。李進進。轉通義郡夫人。

敕。朕飭脩內治。靡形色選之私。周覽掖庭。爰秩婦官之序。有嘉女德。用錫命書。具封某婉孌。自將柔良。有素。知小星盡心之美。不見驕盈。承樛木逮下之恩。惟加肅謹。寢歷歲時之久。備殫夙夜之勤。分樂土以疏封。賁小君而示寵。其祇渙渥。益懋芳猷。

汪義端知舒州

敕。具官某。淮右諸郡。職優而事簡。舒其尤也。爾蚤登甲科。蔚有時望。近膺親擢。欲振臺綱。引去翩然。留之不可。爾才辦劇。屢更盤錯。是邦簡靜。游刃有餘。其與斯民相安于無事。以稱朕安邊固圉之意。

集英殿修撰知紹興府趙不流知廣州趙彥操職事修舉並除煥章閣待制

趙不流

敕。報政輔藩。又見期年之變。疏恩中辰。載加禁路之榮。具官某。慶席仙源。才優吏道。頃由輦轂。彈壓之任。遂爲朝夕。論思之臣。寶婺分符。備著蕃宣之效。會稽奏課。曾陞論議之華。日坐黃堂。庭無留事。風行黔首。時有譽言。登之持橐之聯。壯我維城之勢。帥臨十國。方爲久任之圖。位列四松。不減近班之寵。尙祇明命。以訖外庸。

趙彥操

敕。帥閩雄尊。著南海于蕃之蹟。璽書勉勵。陞西清次對之華。惟我宗英。被茲渙渥。具官某才猷敏劭。學識該通。蚤膺聖父之知。超寘列卿之長。俾兼天邑。有趙張之威名。進攝地官。熟研桑之心計。一辭位著。久閱星霜。姑蘇宣三載之勞。章貢總數州之重。頃踰庾嶺。往鎮番禺。撫蠻徼以不驚。惠賈胡而無擾。載嘉善最。俾正從臣。望雲以求蓬萊。毋謂鷓行之遠。把麾而去江海。乃通豹尾之班。茲曰殊恩。益圖來效。

端明殿學士正奉大夫致仕鄭丙贈四官

敕。引年已久。無復尙書之履聲。遺奏忽聞。庶幾太史之尸諫。舊臣無幾。卹典宜加。具官某氣直而能溫。性剛而善下。立朝正色。爲多士之表儀。典選盡公。慕古人之風采。游更名郡。遂返故鄉。奉祠館以怡神。據禮經而告老。謂因閒適。可迪壽康。不知何恙之深。遽起云亡之嘆。疊升命秩。仍茂賞延。八座班高。篤始終之不替。九京恩及。尙英爽之有知。

資政殿大學士通議大夫范成大轉一官致仕

敕。圖舊人而共政。方媿未能。引大體以乞身。胡爲有請。嗟名臣之老矣。撫往事以慨然。具官某俊逸不羣。風流自命。文章甚偉。崔蔡誠不足多。制誥尤工。王楊當爲之伯。緒餘所出。施設具宜。桂海冰天。望皇靈而益遠。瀛瑤蜀道。專制閩以增雄。是誠宣力于四方。宜俾進官于兩地。出司留籥。遂奉祠庭。用之未盡其才。退而自求其志。臥公幹漳濱之疾。掛隱居神武之冠。寵數彌光。典刑斯在。噫胸中之有兵甲。世稱小范之才。高扁舟之泛江湖。或謂鳴夷之仙去。皆爾鄉閭之舊。豈其苗裔之餘。無忝前良。以全晚節。

范成大贈五官

敕舊弼遺榮。方遂垂車之志。需章上奏。忍聞易簀之言。天不懲遺。人其殄瘁。具官某身登二府。仕歷三朝。詞章議論之高。無慚古昔。東西南北之表。咸著威名。曾輔政之幾何。乃居閒之寢久。九齡之風度可想。晉公之神明不衰。石湖忽墮乎文星。壽櫟遽成夫陳迹。云何不淑。而至于斯。念三吳人士之無多。嘆一代風流之幾盡。躡五階而進秩。按二品以疏恩。噫。三仕三已而賦歸。豈復計生前之事。一官一集之傳遠。尙得垂身後之名。其或有知。當自無憾。

軍器少監黃由將作監

敕具官某。朕有元子。愛之固深。而教之惟恐不至。一時賓僚。極儒雅之選。爾以倫魁之彥。久儀羣玉之府。侃侃正色。抗論不回。自少匠而爲長。蓋亦寵矣。奇巧精能。非以此望汝也。橫經宋邸。使吾兒有直諫多聞之益。是惟休哉。

開府儀同三司判隆興府趙雄少保致仕

敕舊弼偃藩。方倚上流之重。需章請老。遽求故里之歸。逝矣莫留。惻然輿感。具官某謀謨宏遠。識度恢洪。洞往古治忽之原。識當今輕重之體。臨機輒斷。慕如晦彌縫之功。遇事敢爲。有黃裳經濟之略。頃辭朝會。游著民庸。起之西蜀之陬。付以南昌之郡。仰父俯子。寢銷愁嘆之心。襟江帶湖。雅稱詩書之帥。以疾來諗。乞身甚堅。雖深軫予衷。亦重遠雅志。其陟三孤之貴。以華萬里之行。噫。圖任舊人。謂尙堪于大政。注想元

老。惜不究于長才。諒服渙恩。式全嘉遜。

趙雄贈少師

敕。垂車自適。難留故相之歸。屬纊有言。尙篤大臣之誼。殄瘁之嘆。遠邇所均。具官某以康濟之才。際明良之會。坐廟堂而獨任。光輔至尊之朝。解印組以言旋。猶高勇退之節。迨予嗣服。嘗賴矢謨。初爲武侯。渡瀘之行。實重周公分陝之寄。游更帥閫。最得士心。不圖柱石之衰。遂掛衣冠而去。勉親醫藥。猶藉典刑。遽淪九京。奄隔千古。爰防公師之亞。仍如世賞之延。噫。死生旦晝之常。固達人之所諒。君臣始終之分。豈卹典之可稽。慨想冥途。尙散異渥。

湖北提刑張垓江西提刑知池州王謙湖北提刑

敕。具官某等。祖宗哀矜庶獄。分道置使。前古未有也。朕承丕緒。尤遴于擇人。爾垓名臣之子。尙有家法。爾謙儒林之彥。尤長吏才。大江之西。人以終訟爲能。重湖之北。民有斂攘之擾。各務澄按。恤民之可矜。懲吏之無良。使遠方之人。自以爲不冤。朕將有以褒表之。

朝議大夫煥章閣待制馬大同磨勘轉官

敕。一麾出守。實吾從橐之臣。三載陟明。優爾吏銓之制。具官某器資精敏。心計疏通。比從惟月之班。徑上甘泉之列。民曹治賦。更嘉獻納之忠。京口分符。備著蕃宣之效。年勞寔及。治典可稽。俾序進于文階。以增光于侯度。往其祗命。益務告猶。

吏部郎中錢象祖樞密院檢詳

敕具官某。天下之兵。本于宥庭。設屬掄才。實視宰掾。非夫詳練敏明之士。不在茲選。爾起于重珪疊組之家。而以書生自處。蚤更事任。若老于州縣者。出入郎省。殆二十年。敏而不疎。審而無滯。贊吾樞臣。爾其選也。益勉所長。以俟登用。

太府丞曾三聘秘書郎

敕具官某。道山蓬萊。圖籍鉅萬。士夫仰望。真有飄車羽輪之隔。遊其中者。皆天下選也。以爾力學自奮。持論不阿。憂國之心。如飢如渴。擢自外府。徑登清貫。益讀未見書。以昌遠業。且使四部秩然有序。是爲稱職哉。

大理寺主簿王寧新知信陽軍劉崇之並太府寺丞

敕具官某等。寺監皆有丞。而外府設官獨詳焉。蓋欲上裨版曹之調度。下柅有司之出納。不可以非其人也。以爾寧文詞蔚然。明習吏道。勾稽棘寺。平反爲多。爰俾序遷。以酬勞動。爾崇之聲稱籍甚。蚤登著庭。出守邊方。占對尤敏。使還朝蹟。以慰公言。所貴于儒者。爲其能通世務。其以所學。見之事故。勉哉。

宗正少卿鄭汝諧右文殿修撰知池州

敕具官某。爾以科級自奮。以才謂見稱。持節分符。俱有聲績。登之卿列。進攝禁途。迫命爲真。乃有異論。朕方避論思之選。屢欲留行。爾乃陳去就之義。力求引退。畀以右文論議之職。往撫池陽凋瘵之餘。式邁其

行。慰彼黎庶。

忠翊郎屠思正監轄製造御前軍器所實及五年轉一官

敕具官某除戎器以戒不虞。國之務也。爾職其事。遂閱五年。何愛一官。以獎勞勤。

壽聖皇太后慶八十詔書文武陞朝官等加封祖父母定詞

臺諫卿監郎官以上封祖父并父

敕具官某父某。朕日侍慈皇。推尊祖后。母儀備三朝之盛。壽簡增八袞之崇。奉徽稱于日至之長。講慶禮

于元正之始。爰本親親之道。用推老老之恩。以爾積善有餘。潛光不試。粵有賢子。祖父云揚于王庭。臺官云

列屬憲臺。卿少云。列在月卿。郎官云。列在名曹。都司云。宰據是司。聿觀緝典之行。可後高年之渥。爰陞命秩。以示寵光。益務教忠。用圖顯

報。

臺諫卿監郎官以上封祖母并母

敕具官某母某氏。同前制朕日侍慈皇至用推老老之恩。以爾婦道素全。壺彝甚飭。粵有賢子。祖母云。賢孫云。揚于王庭。臺官云。列屬憲

在月卿。郎官云。列在名曹。都司云。宰據是司。聿觀緝典之行。可後高年之渥。爰加沐邑。以示寵光。郡夫人。愛封名郡。國夫人。晉封大國。

職事官內外陞朝官京局京官選人在外京官選人封祖父母父母

敕具官某父某。朕以祖后壽登八袞。恭侍慈皇。奉上萬年之觴。爰推老老之恩。以廣親親之道。以爾潛光

不試。積善有餘。祖母并母云。壺彝甚飭。婦道有聞。子仕朝行。身逢慶霈。祖父云。孫仕朝行。朝官云。子通朝籍。京局京官選人云。子仕中都。在外京官選人云。子在仕途。爰加



異渥以惠高年。

知樞密院事趙汝愚初除封贈

曾祖太子少保士慮太子太保

敕我有宗臣進長樞筦雖循牆而避寵終出綽以疏榮貴震一時恩及三世具官某分暉帝胄履善家庭九族序遷曾不登于膺仕百年隱行乃有見于後人惟爾曾孫既登右府亞于宮保已賁幽原爰加再命之崇遂列三師之重前無舊比歿有餘光

曾祖母高平郡夫人龔氏文安郡夫人

敕位尊任重必有家傳積厚流光亦由闡政恩既加于曾廟封宜進于小君具封某以柔淑之資嬪信厚之族雖中饋之職無顯于外而內則之懿能肥其家逮三葉而益昌位元樞而鼎貴載加名郡以表芳猷

祖太子少傅不求太子太傅

敕紫樞元臣方隆于同姓青宮亞傅嘗寵于大家位既愈崇恩亦宜稱具官某奕奕帝王之胄恂恂儒素之風教子以經至孫而貴鳴珂佩玉雖不見于生前疊組重圭乃追榮于身後進登一品以慰九京

祖母咸寧郡夫人晁氏濟陽郡夫人

敕世胄高華本由濟北之族慶源流衍實自召南之風具封某躬蘋蘩之勤遵圖史之訓功容俱備典則不渝教子有方能甘啜菽之養撫孫甚愛具有含飴之歡茲領樞庭以翊輿運頃嘗頒去沐邑俾載益于

郡封爰分廣濟之名。式慰謹終之意。

父太子少師善應太子太師

敕。眷我維城。固多將相侯王之貴。惟爾有子。遂爲股肱心膂之臣。可無寵光。載篤餘慶。具官某家。法有自天。資尤高。及見太平。猶記開元之際。結交前輩。尙聞正始之音。躬曾閱之。孝欽慕間平之儒雅。爰謹家庭之訓。遂傳宥府之賢。乃進宮師。以彰陽報。其祇明命。益啓後昆。

母安化郡夫人李氏饒陽郡夫人

敕。愛君憂國。繫我本兵之良。媿德娠賢。可後榮親之渥。具封某稟。資柔懿。植操幽閒。以澤底之名家。歸天潢之支派。〔案〕澤底一本疑底字誤。因缺之。考唐李肇國史補以澤底李與岡頭盧士門崔並稱。可證其不誤。中閨甚肅。不辭舉案之勤。令子著名。端自斷機之訓。云何不淑。其後遂興。洵啓博陵之封。以示冥途之寵。

妻鄱陽郡夫人徐氏通義郡夫人

敕。大臣許國。有光麟趾之宗。夫人起家。無媿鵲巢之隱。惜悼亡之已久。宜追遠以加榮。具封某生。自儒門。嬪于皇族。身能全于婦道。生弗永乎天年。迨夫子之登庸。嗟室人之冥漠。視其爵秩。賁以恩光。易番水之舊封。界眉山之新渥。尙惟靈爽。式光欽承。

